

摘藻堂四庫全書薈要

史部

欽定四庫全書薈要

史部

通志卷一百三十七

詳校官員外郎臣楊世綸



欽定四庫全書薈要卷九千五十四

史部

通志卷一百三十七

宋右迪功郎鄭樵漁仲撰

列傳第五十

齊

褚淵

長子貢

貢弟綦

淵弟澄

王儉

儉弟遜

虔

僧虔

子慈

僧虔

從

柳世隆

王晏

子德元

子僧祐

僧祐

從子融

從

晏弟

訓

晏從

徐孝嗣

王琨

張敬兒

王敬則

父弟思遠

陳顯達

庾弘遠

崔慧景

宗人恭祖陽女子婁逞

東

李安人

子元履

戴僧靜

桓康

焦度

曹虎

呂安國

周山

圖

周盤龍

子奉叔

王廣之

桓崇祖

夏侯恭叔崇祖從父兄

榮祖

榮祖

從父閔

閔子禧伯

閔

沈文季

兄

弟子曇深

曇深妻鄭氏

丘景賓

昭畧

昭畧弟昭光

劉懷珍

子靈哲

從子懷慰

昭光兄子曇亮

族弟善明

善明

從弟

薛深

張欣泰

王真

從父兄續續弟約

褚淵字彥回河南陽翟人也祖秀之宋太常父湛之尚

書左僕射附載叔父祠部尚書裕之傳淵少有清譽宋

元嘉末魏軍逼瓜步百姓咸負擔而立湛之時為丹陽尹使其子弟並著芒屨於齋前習行或譏之湛之曰安不忘危也淵時年十餘歲甚有慙色湛之有一牛至所愛無故墮聽事前井湛之率左右躬自營救之郡中諠擾淵下簾不視也又有門生盜其衣淵遇見謂曰可密藏之勿使人見此門生慙而去不敢復還後貴乃歸罪待之如初淵尚文帝女南郡獻公主姑姪二世相繼拜駙馬都尉除著作佐郎累遷祕書丞湛之卒淵悉推財

與弟澄唯取書數千卷湛之有兩厨寶物在淵所生郭氏間嫡母吳縣公主求之郭欲不與淵曰但令淵在何患無物猶不許淵流涕固請乃從之襲爵都鄉侯歷位尚書吏部郎景和中山陰公主淫恣窺見淵而悅之以白帝帝召淵西上閣宿十日公主夜就之備見逼迫淵整身而立從夕至曉不為移志公主謂曰君鬚髯如戟何無丈夫意淵曰淵雖不敏何敢首為亂階宋明帝即位累遷吏部尚書有人求官密於袖中將一餅金因求

請間出金示之曰人無知者淵曰卿自應得官無假此
物若必見與不得不相告此人大懼收金而去淵叙其
事而不言其名時人莫之知也帝之在藩也與淵以風
素相善至是深相委寄陳事皆見從改封雋都伯歷侍
中領尚書右衛將軍淵美儀貌善容止俯仰進退咸有
風則每朝會百僚及遠國使莫不延首目送之明帝嘗
歎曰褚淵能遲行緩步便得宰相矣時人以方何平叔
嘗聚袁粲舍初秋涼夕風月甚美淵援琴奏別鵠之曲

宮商既調風神諧暢王或謝莊並在桀坐撫節而歎曰
以無累之神合有道之器宮商暫離不可得已時僖人
常珍奇與薛安都為逆降叛非一後又求降明帝加以
重位淵謂全其首領於事已弘不足大加寵異帝不從
珍奇尋又叛淵後為吳郡太守帝寢疾危殆馳使召之
欲託後事及至召入帝自帳中流涕曰吾近危篤故召
卿欲使著黃羅襪耳指牀頭大函曰文書皆函內冀此
函不得復開淵亦悲不自勝黃羅襪乳母服也帝雖小

間猶懷身後慮建安王休仁人才令美物情宗尚帝與
淵謀誅之淵以為不可帝怒曰卿癡不足與議事淵懼
而奉旨復為吏部尚書衛尉卿尚書右僕射淵以母年
高羸疾晨昏須侍養辭衛尉不許明帝崩遺詔以為中
書令護軍將軍與尚書令袁粲受顧命輔幼主粲等雖
同見託而意在淵淵同心理事當奢侈之後務弘儉約
百姓賴之既而王道隆阮佃夫用事姦賂公行淵不能
禁也遭庶母郭氏喪數日中毀頓不復可識晷年不盥

櫛唯泣淚處乃見其本質焉詔斷哭禁弔客葬畢起為
中軍將軍本官如故元徽二年桂陽王休範反淵與衛
將軍袁粲入衛宮省鎮集衆心淵初為丹陽與從弟炤
同載出道逢高帝淵舉手指高帝車謂炤曰此非常人
也出為吳興高帝餉物別淵又語人曰此人才貌非常
將來不可測也及顧命之際引高帝與焉高帝既平桂
陽遷中領軍南兗州高帝固讓與淵及衛軍袁粲以書
陳情淵粲答書不從高帝乃受命其年加淵尚書令侍

中給班劍二十人固讓令三年進爵為侯服闋改受中書監侍中護軍如故給鼓吹一部時淮地屬北江南無復鰓魚或有間關得至者一枚直數千錢人有餉淵鰓魚三十枚淵時雖貴而貧薄過甚門生有獻計賣之云可得十萬錢淵變色曰我謂此是食物非曰財貨且不知堪賣錢聊爾受之雖復儉乏寧可賣餉取錢也悉與親游噉之少日便盡明年嫡母吳郡公主薨毀瘠如初葬畢詔攝職固辭又以朞祭禮及表解職並不許蒼梧

暴虐稍甚高帝與淵及袁粲言世事粲曰主上幼年微過易改伊霍之事非季世所行縱使功成亦終無全地淵默然歸心高帝及廢蒼梧羣公集議袁粲劉秉既不受任淵曰非蕭公無以了此手取書授高帝帝曰相與不肯我安得辭事乃定順帝立改號將軍開府儀同三司侍中如故甲仗五十人入殿袁粲雖與淵勦力常疑淵有異志曰褚公眼睛多白所謂白虹貫日亡宋者終此人也他日又謂淵曰國家所倚惟公與劉丹陽及粲

耳願各自勉無使竹帛所笑淵曰願以鄙心寄公之腹則可矣然竟不能負固及高帝輔政王儉議加黃鉞任遐曰此大事應報褚公帝曰褚脫不與卿將何計遐曰彥回保妻子愛性命非有奇才異節遐能制之果無違異及沈攸之事起高帝召淵謀之淵曰西夏釁難事必無成公當先備其內耳蓋謂袁粲之徒也高帝密為其備事平進中書監司空齊臺建淵白高帝引何曾自魏司徒為晉丞相求為齊官高帝嫌而不許建元元年進

位司徒侍中中書監如故改封南康郡公淵讓司徒乃與僕射王儉書欲依蔡謨事例儉以為非所宜言勸淵受命終不就尋加尚書令二年重申前命為司徒又固讓魏軍動高帝欲發王公以下無官者從軍淵諫以為無益實用空致擾動上乃止三年七月帝親嘗耐盛暑欲夜出淵與左僕射王儉諫以為自漢宣帝以來不夜入廟所以誠非常人君之重所宜克慎從之時朝廷機密事淵多與議謀每見從納禮遇甚重上嘗大宴集酒

後謂朝臣曰卿等並宋時公卿亦當不言我應得天子
王儉等未及答淵斂版曰陛下不得言臣不早識龍顏
上笑曰吾有愧文叔知公為朱祐久矣淵涉獵文義善
彈琵琶武帝在東宮宴集賜淵金鏤柄銀柱琵琶淵性
和雅有器度不妄舉動宅嘗失火煙焰甚逼左右驚擾
淵神色恬然索輿徐去然世頗以名節譏之于時百姓
語曰可憐石頭城寧為袁粲死不作褚淵生高帝崩遺
詔以淵為錄尚書事江左以來無單拜錄者有司疑立

優策尚書令王儉議以為見居本官別拜錄應有策書而舊事不載中朝以來三公王侯則優策並設官品第二策而不優優者褒美策者兼明委寄尚書職居天官政化之本故尚書令品雖第三拜必有策錄尚書品秩不見而總任彌重前代多與本官同拜故不別有策即事緣情不容均之凡僚宜有策書用申隆寄既異王侯不假優文從之尋增淵班劍為三十人五日一朝頃之寢疾淵少時嘗疾篤夢人以卜著一具與之遂差其一

至是年四十八矣歲初便寢疾而太白熒惑相繼犯上
將淵慮不起表遜位武帝不許乃改授司空驃騎將軍
侍中錄尚書如故上遣侍中問疾無何薨年四十八家
無餘財負債至數十萬詔給東園祕器時司空掾屬以
淵未拜疑應為吏敬不王儉議依禮婦在途聞夫家喪
改服而入今掾屬雖未服勤而吏節稟於天朝宜申禮
敬司徒府吏又以淵既解職而未參後授府猶應上服
以不儉又議依中朝士孫德祖從樂陵遷為陳留未入

境樂陵郡吏依見君之禮陳留迎吏依娶女有吉日齊

衰弔司徒府宜依居官制服贈太宰侍中錄尚書公如
故增班劍為六十人給節加羽葆鼓吹葬送之禮悉依
宋太保王弘故事謚曰文簡先是庶姓三公轎車未有
定格王儉議官品第一皆加幢絡自淵始也又詔淵妻
宋故巴西公主嬋嬋暫啓宜贈南康郡公夫人長子賁
字蔚先少耿介父背袁粲等附高帝賁深執不同終身
愧恨之故有栖退之志位侍中淵薨服闋見武帝賁流

涕不自勝上甚嘉之以為侍中領步兵校尉左戶尚書
常謝病在外上以此望之遂諷令辭爵讓與弟綦仍居
墓下及王儉薨乃騎水牛出弔以繫門外柱入哭盡哀
而退家人不知也會疾篤其子霽載以歸疾小間知非
故處大怒不肯復飲食內外閤悉釘塞之不與人相關
數日裁餘氣息謝薨聞其弊往候之排閤不可開以杵
槌破進見賁曰事之不可得者身也身之不可全者名
也名與身俱滅者君也豈不全之哉賁曰吾少無人間

志豈身名之可慕但願啓手歸全必在舊壠兒輩不才
未達余趣移尸徙殯失吾素心以此更為恨耳永明七
年卒綦字茂緒位義興太守改封巴東郡侯明年表讓
封還賁子霽詔許之建武末綦位太子詹事度支尚書
領前軍將軍永元元年卒贈太常諡穆子綦子向向子
翔翔列在梁史淵弟澄字彥道初湛之尚宋孝武女始
安公主薨納側室郭氏生淵後尚吳郡公主生澄淵事主
孝謹主愛之湛之亡主表淵為嫡澄尚宋文帝女廬江

公主拜駙馬都尉歷官清顯善醫術建元中為吳郡太守百姓李道念以公事到郡澄見謂曰汝有重疾答曰舊有冷疾至今五年衆醫不差澄為診脉謂曰汝病非冷非熱當是食白瀹雞子過多所致令取蒜一升煮服之始一服乃吐出一物如升涎裏之能動開看乃是雞雛羽翅爪距具足能行走澄曰此未盡更服所餘藥又吐得如向者雞十三頭而病都差當時稱妙豫章王感病高帝召澄為療立愈尋遷左戶尚書淵薨澄以錢一

萬一千就招提寺贖高帝所賜淵白貂坐褥壞作裘及
襖又贖淵介幘犀導及淵常所乘黃牛永明元年為御
史中丞袁彖所奏免官禁錮見原遷侍中領右軍將軍
以勤謹見知澄女為東昏后永元元年卒贈金紫光祿
大夫淵從父弟炤字彥宣父法顯鄱陽太守炤少有高
節王儉嘗稱才堪保傅為成安郡還以一目眇召為國
子博士不拜常非淵身事二代淵子賁往問訊炤炤問
曰司空今日何在賁曰奉璽鞍在齊大司馬門炤正色

曰不知汝家司空將一家物與一家亦復何謂淵拜司
徒賓客滿坐炤歎曰彥回少立名行何意披猖至此門
戶不幸乃復有今日之拜使彥回作中書郎而死不當
是一名士邪名德不昌遂有期頤之壽淵性好戲以輅
車給之炤大怒曰著此辱門戶那可令人見索火燒之
馭人奔車乃得免弟炫字彥緒少清簡為從舅王景文
所知從兄淵謂人曰從弟廉勝獨立乃十倍於我也累
遷正員外郎從宋明帝射雉至日中無所得帝甚猜羞

召問侍臣曰吾旦來如臯遂空行可笑坐者莫答炫獨
曰今節候雖適而雲霧尚凝故斯輩之禽驕心未警但
得神駕遊豫羣情便可載懽帝意解乃於雉場置酒遷
中書侍郎司徒右長史昇明初炫以清尚與彭城劉悛
陳郡謝朓濟陽江斆入殿內侍文義號為四友齊臺建
為侍中領步兵校尉以家貧建元初出補東陽太守前
後三為侍中與從兄淵操行不同故淵之世不至大官
永明元年為吏部尚書炫居身清立非弔問不雜交游

論者以為美及在選部門庭蕭索賓客罕至出行左右
常捧一黃紙帽箱風吹紙剝殆盡罷江都郡還得錢十
七萬於石頭并分與親族病無以市藥以冠劍為質表
自陳解改授散騎常侍領安成王師國學建以本官領
博士未拜卒無以殯殮時年四十一贈太常謚貞子子
澣附其孫玠傳在陳史

王儉字仲寶琅邪臨沂人也祖曇首宋光祿大夫父僧
綽侍中曇首自有傳儉生而僧綽為元凶劼所害養於

叔父僧虔數歲襲爵豫寧侯拜受流涕嗚咽幼有神采
專心篤學手不釋卷賓客或相稱美僧虔曰我不患此
兒無名政恐太盛耳乃手書崔子玉座右銘以貽之丹
陽尹袁粲聞其名及見之曰枯柏豫章雖小已有棟梁
姿矣終當任人家國事乃言之於宋明帝選尚陽羨公
主拜駙馬都尉帝以儉嫡母武康公主同泰初巫蠱事
不可以為婦姑欲開冢離葬儉因人自陳密以死請故
事不行年十八解褐祕書郎太子舍人超遷祕書丞典

校墳籍依七略撰七志四十卷表獻之又撰定元徽四部書目母憂服闋為司徒右長史晉令公府長史著朝服宋大明以來著朱衣儉上言宜復舊制時議不許及蒼梧暴虐儉懼告袁粲求外出引晉新安主壻王獻之任吳興為例補義興太守昇明二年為長兼侍中以父終此職固讓先是高帝為相欲引時賢參讚大業時謝朓為長史帝夜召朓却人與語久之朓無言唯有二小兒捉燭帝慮朓難之仍取燭遣兒朓又無言帝乃呼左

石儉素知帝雄異後請間言於帝曰功高不賞古來非
一以公今日位地欲北面居人臣可乎帝初正色裁之
而神采內和儉因又曰儉蒙公殊眄是以吐所難吐公
何賜拒之深誠以景和元徽之淫虐非公豈復寧濟但
人情澆薄不能持久公若小復推遷則人望去矣豈唯
大業永淪七尺之軀豈可得保帝笑曰卿言不為無理
儉又曰公今名位故是經常宰相宜禮絕羣后微示變
革當先令褚公知之儉請銜命帝曰我當自往經少日

帝自造淵歎言移晷乃謂曰我夢應得官淵曰今授始爾恐一二年間未容便移且吉夢未必便在旦夕帝還告儉儉曰褚是未達理虞整時為中書舍人甚閑辭翰儉乃自報整使作詔及高帝為太尉引儉為右長史尋轉為左專見任用及大典將行儉為佐命禮儀詔策皆出於儉褚淵唯為禪詔又使儉參懷定之齊臺建遷尚書右僕射領吏部時年二十八多所引進客有姓譚者詣儉求官儉曰齊侯滅譚那得有君客曰譚子奔莒是

以有僕儉賞其善據卒得職焉高帝嘗從容謂儉曰我
今日當以清溪為鴻溝對曰天應人順庶無楚漢之事
時朝儀草創衣服制則未有定準儉議曰漢景六年梁
王入朝中郎謁者金貂出入殿門左思魏都賦云謁謁
列侍金貂齊光此藩國侍臣有貂之明文晉百官表云
太尉參軍四人朝服武冠此又宰府之明文又疑百僚
敬齊公之禮儉又曰晉王受命勸進云冲等拳拳稱名
則應盡禮明矣又世子禮秩未定儉復曰春秋曹世子

來朝待以上公之禮下其君一等今齊公九命禮冠列
蕃世子亦宜異數並從之世子鎮石頭城仍以為世子
宮儉又曰魯有靈光殿漢之前例也由是以聽事為崇
光殿外齋為宣德殿以散騎常侍張緒為世子詹事車
服悉依東宮制度高帝踐阼與儉議佐命功臣從容謂
曰卿謀謨之功莫與為二卿止二千戶意以為少趙充
國猶能自奉西零之任况卿與我情期異常儉曰昔宋
祖創業佐命諸公開國不過二千以臣比之惟覺超越

上笑曰張良辭侯何以過此建元元年改封南昌縣公
時都丁舛雜且多姦盜上欲立符伍家家以相檢括儉
諫曰京師翼翼四方是湊必也持符於事既煩理成不
曠謝安所謂不爾何以爲京師乃止是歲有司奏定郊
殷之禮儉以爲宜以今年十月殷祭宗廟自此以後五
年再殷祭二年正月上辛有事于南郊即以其日還祭
明堂又用次辛饗祀北郊而並無配從之明年轉左僕
射領選如故宋明帝紫極殿珠簾綺柱飾以金玉江左

所未有高帝欲以其材起宣陽門儉與褚淵及叔父僧
虔連名表諫上手詔酬納宋世宮門外六門城設竹籬
是年初有發白虎搏言白門三重門竹籬穿不完上感
其言改立都牆儉又諫上答曰吾欲後世無以加也朝
廷初基制度草創儉問無不決上歎曰維岳降神生甫
及申今天為我生儉也其年固請解選見許帝幸樂游
苑宴集謂儉曰卿好音樂孰與朕同儉曰沐浴唐風事
兼比屋亦既在齊不知肉味帝稱善帝後幸華林園曲

宴羣臣數人使各効伎藝褚淵彈琵琶王僧虔柳世隆彈琴沈文季歌子夜來張敬兒舞儉曰臣無所解唯知誦書因跪上前誦相如封禪書上笑曰此盛德之事吾何以堪之後上使陸澄誦孝經起自仲尼居儉曰澄所謂博而寡要臣請誦之乃誦君子之事上章上曰善張子布更覺非奇也於是王敬則脫朝服袒以絳糾髻奮臂拍張呌動左右上不悅曰豈聞三公如此答曰臣以拍張故得三公不可忘拍張時以為名答儉尋以本官

領太子詹事加兵三百人時皇太子妃薨左衛將軍沈
文季經為宮臣未詳服以不儉議曰漢魏以來宮僚先
備臣隸之節且體在三存既盡敬亡豈無服昔庾翼喪
妻王允媵含猶謂府吏宜有小君之服况臣節之重宜
依舊君之妻齊衰三月而除上崩遺詔以儉為侍中尚
書令鎮軍每上朝令史恒有三五十人隨上諮事辯析
未嘗壅滯褚淵時為司徒錄尚書笑謂儉曰觀令判斷
甚樂儉曰所以得厝私懷實由稟明公不言之化武帝

即位給班劍二十人進號衛將軍掌選事時有司以前
代嗣位或仍前郊年或別為郊始晉宋以來未有畫一儉
議曰晉明帝太寧三年南郊其年九月崩成帝即位明
年改元亦郊簡文咸安三年南郊其年七月崩孝武即
位明年改元亦郊宋元嘉三十年正月南郊二月崩孝
武嗣位明年亦郊此二代明例差可依放今聖明繼業
幽顯宅心言化則頻郊非嫌語事則元號初改禋燎登
配孝敬兼遂謂明年正月宜饗禮二郊虞祭明堂自茲

以後依舊間歲有司又以明年正月上辛應南郊而立
春在上辛後郊在立春前為疑儉曰宋景平元年正月
三日辛丑南郊其月十一日立春元嘉十六年正月六
日辛未南郊其月八日立春此近世明例也並從之永
明二年領丹陽尹三年領國子祭酒又領太子少傅舊
太子敬二傅同至是朝議接少傅以賓友禮宋時國學
頽廢未暇修復宋明帝泰始六年置總明觀以集學士
或謂之東觀置東觀祭酒一人總明訪舉郎二人儒元

文史四科科置學士十人其餘令史以下各有差是歲以國學既立省總明觀於儉宅開學士館以總明四部書充之又詔儉以家為府四年以本官領吏部先是宋孝武好文章天下悉以文采相尚莫以專經為業儉幼年留意三禮尤善春秋發言吐論造次必於儒教由是衣冠翕然並尚經學儒教於此大興何承天禮論三百卷儉抄為八帙又別抄條目十三卷朝儀舊典晉宋以來施行故事撰次諳憶無遺漏者所以當朝理事斷決

如流每博議引證先儒罕有其例八坐丞郎無能異者
令史諮事賓客燕席儉應接銓序傍無留滯十日一還
監試諸生巾卷在庭劔衛令史儀容甚盛作解散幘斜
插簪朝野慕之相與倣效儉常謂人曰江左風流宰相
唯有謝安蓋自況也武帝深委仗之士流選用奏無不
可五年儉即本號開府儀同三司固讓六年重申前命
先是詔儉三日一還朝尚書令史出諮事上以往來煩
數詔儉還尚書下省月聽十日出外儉啓求解選上不

許七年乃上表固請見許改領中書監參掌選事其年疾上親臨視薨年四十八詔衛軍文武及臺所給兵仗悉停待葬又詔追贈太尉加羽葆鼓吹增班劍為六十人葬禮依太宰文簡公褚淵故事謚文憲公儉寡嗜慾唯以經國為務車服塵素家無餘財手筆典裁為當時所重少便有宰臣之志賦詩云稷契匡虞夏伊呂翼商周及生子字曰元成取仍世作相之義儉撰古今喪服集記并文集行於世梁武受禪詔為儉立碑降爵為侯

儉弟遜宋昇明中為丹陽丞告劉秉事不蒙封賞建元
初為晉陵太守有怨言儉慮為禍因褚淵啟聞中丞陸澄
依事舉奏詔以儉竭誠佐命特降刑書宥遜徙永嘉於
道伏誅儉長子騫嗣列在梁史儉叔父僧虔幼時父曇
首嘗與兄弟集會諸子孫任其戲適僧達跳下地作虎
子僧虔累十二博碁既不墜落亦不重作僧綽採蠋燭
珠為鳳凰僧達奪取打壞亦不復惜伯父弘歎曰僧達
俊爽當不減人然亡吾家者終此子也僧虔必至公僧

綽當以名義見美或云僧虔採燭珠為鳳凰弘稱其長者云僧虔弱冠善隸書宋文帝見其書素扇歎曰非唯迹逾子敬方當器過之除祕書郎遷太子舍人性退默少交接與袁淑謝莊善淑每嘆之曰卿文情瀟麗學解深拔而韜光潛寶物莫之窺雖魏陽元之射王汝南之騎無以加焉遷司徒左西屬初兄僧綽之遇害也其親賓咸勸僧虔逃隱僧虔泣曰吾兄奉國以忠貞撫我以慈愛今日之事苦不見及耳若同歸九泉猶羽化也孝

武初出為武陵太守攜諸子姪兄子儉於中途得病僧
虔為廢寢食同行客慰喻之僧虔曰昔馬援處子姪之
間一情不異鄧攸於弟子更逾所生吾實懷其心誠未
異古亡兄之肩不宜忽諸若此兒不救便當迴舟謝職
無復遊宦之情矣還為中書郎再遷太子中庶子孝武
欲擅書名僧虔不敢顯迹大明世常用掘筆書以此見
容遷御史中丞領驍騎將軍甲族向來多不居憲臺王
氏以分枝居烏衣者位宦微減僧虔為此官乃曰此是

烏衣諸郎坐處我可試為耳泰始中為輔國將軍吳興太守始王獻之善書為吳興郡手迹尤工及僧虔為郡時書又多合論者稱之徙為會稽太守中書舍人阮佃夫家在東請假歸客勸僧虔以佃夫要幸宜加禮接僧虔曰我立身有素豈能曲意此輩彼若見惡正當拂衣而去耳佃夫言於明帝使御史中丞孫資奏僧虔前泣吳興多有謬命坐免官尋以白衣領侍中元徽中為吏部尚書尋加散騎常侍轉右僕射昇明二年為尚書令

嘗為飛白書題尚書省壁曰圓行方止物之定質修之
不已則溢高之不已則慄馳之不已則躓引之不已則
迭是故去之宜疾當時嗟賞以比坐右銘兄子儉每覲
見輒勗以前言往行忠貞止足之道雅好文史解聲樂
以朝廷禮樂多違正典民間競造新聲雜曲時高帝輔
政僧虔上表請正聲樂高帝乃使侍中蕭惠基調正清
商音律齊受命轉侍中丹陽尹郡縣獄相承有上湯殺
囚僧虔上言湯本救疾而實行寃暴若罪必入重自有

正刑若去惡宜疾則應先啟豈有死生大命而潛制下
邑上納其言而止文惠太子鎮雍州有盜發古冢者相
傳云是楚王冢大獲寶物有玉履玉屏風竹簡書青絲
綸簡廣數分長二尺皮節如新有得十餘簡以示僧虔
僧虔乃云是科斗書考工記周官之所闕文也高帝素
善書篤好不已與僧虔賭書畢謂曰誰為第一對曰臣
書第一陛下亦第一上笑曰卿可為善自為謀矣或云
帝問我書何如卿答曰臣正書第一草書第二陛下草

書第二正書第三臣無第三陛下無第一帝大突曰卿
善為辭然天下有道立不與易也帝示僧虔古迹十一
卷就求能書人名僧虔得民間所有卷中所無者吳大
皇帝景帝歸命侯書桓玄書及王丞相導領軍洽中書
令珉張芝索靖衛伯儒張翼十一卷奏之又上羊欣所
撰能書人名一卷其年遷征南將軍湘州刺史侍中如
故清簡無所欲不營財產百姓安之武帝即位僧虔以
風疾欲陳解會遷侍中左光祿大夫開府儀同三司僧

虔少時羣從宗族並會客有相之者云僧虔年位最高
仕當至公餘人莫及及此授僧虔謂兄子儉曰汝任重
於朝行當有八命之禮我若復此授則一門有二台司
實可畏懼乃固辭不拜上優而許之改授侍中特進光
祿大夫客問僧虔固辭之意僧虔曰君子所憂無德不
憂無寵吾衣食周身榮位已過所慙膚薄無以報國豈
容更受高爵方貽官謗邪儉既為朝宰起長梁齋制度
小過僧虔視之不悅竟不入戶儉即日毀之永明三年

薨時年六十贈司空侍中如故謚簡穆僧虔頗解星文
夜坐見豫章分野當有事故時僧虔子慈為豫章內史
慮其有公事少時而僧虔薨慈棄郡奔赴時有前將軍
陳天福坐討唐寓之於錢唐掠奪百姓財物棄市先是
天福將行令家人豫作壽冢未至東又信催速就冢成
而得罪因以葬焉又宋世光祿大夫劉鎮之年三十許
病篤已辦凶具既而疾愈因畜棺為壽九十餘乃亡此
器方用因此而言天道未易知也僧虔論書云宋文帝

書自言可比王子敬時議者云天然勝羊欣功夫少於
欣王平南虞右軍叔過江右軍之前以為最亡曾祖領
軍右軍云弟書遂不減吾變古制今唯右軍領軍不爾
至今猶法鍾張亡從祖中書令書子敬云弟書如騎驪
駸駸恒欲度驂騑前庾征西翼書少時與右軍齊名右
軍後進庾猶不分在荊州與都下人書云小兒輩厭家
雞愛野鷺皆學逸少書須吾下當比之張翼王右軍自
書表晉穆帝令翼寫題後答右軍當時不別久後方悟

云小人幾欲亂真張芝索靖韋誕鍾會二衛並得名前
代無以辨其優劣唯見其筆力驚異耳張澄當時亦呼
有意郝愔章草亞於右軍郝嘉賓草亞於二王緊媚其
父桓玄自謂右軍之流論者以比孔琳之謝安亦入能
書錄亦自重為子敬書嵇康詩羊欣書見重一時親受
子敬行書尤甚正乃不稱名孔琳之書天然縱放極有
筆力規矩恐在羊欣後丘道護與羊欣俱面受子敬故當
在欣後范曄與蕭思話同師羊欣後小叛既失故步為

復小有意耳蕭思話書羊欣之影風流趨好殆當不減
筆力恨弱謝綜書其舅云繁生起是得賞也恨少媚好
謝靈運書乃不倫遇其合時亦得入流賀道力書亞丘
道護庾昕學右軍亦欲亂真矣僧虔嘗自書讓尚書令
表辭制既雅筆迹又麗時人以比子敬崇賢吳郡顧寶
先卓越多奇自以伎能僧虔乃作飛白以示之寶先曰
下官今為飛白屈矣僧虔著書賦儉為注序甚工僧虔
宋世嘗有書誠子曰知汝恨吾未許汝學欲自悔厲或

以闔棺自欺或更擇美業且得有慨亦慰窮生但亟聞
斯唱未覩其實吾未信汝非徒然也往年有意於史取
三國志聚置牀頭百日許復徙業就元汝曾未窺其題目
未辨其指歸而終日自欺人不受汝欺也由吾不學無
以為訓然重華無嚴父放勛無令子亦各由已耳汝輩
竊議亦當云阿越不學何忽自課汝見其一耳不全爾
也設令吾學如馬鄭亦復甚勝復倍不如今亦必大減
致之有由從身上來也汝今壯年自勤數倍許勝劣及

吾耳吾在世雖乏德素要復推排人間十許年故是一
舊物人或以比數汝耳即化之後若自無調度誰復知
汝事者舍中亦有少負令譽弱冠越超清級者于時王
家門中優者龍鳳劣猶虎豹失蔭之後豈龍虎之議况
吾不能為汝蔭政應各自努力耳或有身經三公茂爾
無聞布衣寒素卿相屈體父子貴賤殊兄弟聲名異何
也體盡讀數百卷書耳吾今悔無所及欲以前車誡爾
後乘也汝年入立境方應從宦兼有室累何處復得下

惟如王郎時邪各爾身已切豈復關吾邪鬼唯知愛深
松茂柏寧知子弟毀譽事因汝有感故略叙胸懷子慈
字伯寶年八歲外祖宋太宰江夏王義恭迎之內齋施
寶物恣所取慈取素琴石硯及孝子圖而已義恭善之
袁淑見其幼時撫其背曰叔慈內潤也少與從弟儉共
書學謝鳳子超宗嘗候僧虔仍往東齋詣慈慈正學書
未即放筆超宗曰卿書何如虔公慈曰慈書比大人如
雞之比鳳超宗狼狽而退十歲時與蔡興宗子約入寺

禮佛正遇沙門懺約戲慈曰衆僧今日可謂虔虔慈應聲曰卿如此何以興蔡氏之宗歷位吳郡太守大司馬長史侍中領步兵校尉司徒左長史慈患脚武帝勅王晏慈有微疾不能騎聽乘車在仗後江左以來少例也慈妻劉秉女子觀尚武帝長女吳縣公主修婦禮姑未嘗交答江夏王鋒為南徐州王妃慈女也以慈為東海太守行徐州府州事還為冠軍將軍廬陵王中軍長史未拜永明九年卒贈太常謚懿子子泰附慈弟志傳列

在梁史僧虔從子僧祐字允宗祖孺宋光祿大夫父遠
光祿勳時人謂遠如屏風屈曲從俗能蔽風露言能不
乖物理也僧祐幼聰悟叔父微撫其首曰兒神明意用
當不作率爾人雅為從兄儉所重每鳴笳列騶到其門
候之僧祐輒稱疾不前儉曰此吾之所望若人也世皆
推儉之愛名德而重僧祐之不趨勢也未弱冠頻經憂
居喪至孝服闋髮落略盡殆不立冠帽舉秀才為驃騎
法曹羸瘠不堪受命雅好博古善老莊不尚繁華工草

隸書善鼓琴亭然獨立不交當世沛國劉瓛聞風而悅
上書薦之為著作佐郎遷司空祭酒謝病不與公卿游
高帝謂王儉曰卿從可謂朝隱答曰臣從非敢妄同高
人直是愛閑多病耳經贈儉詩云汝家在市門我家在
南郭汝家饒賓侶我家多鳥雀儉時聲高一代賓客填
門僧祐不為之屈時人嘉之稍遷晉安王文學而陳郡
袁利為友時人以為妙選武帝數閱武僧佑獻講武賦王
儉借觀不與竟陵王子良聞其工琴於坐取琴進之不

從命永明末為太子中舍人在直屬疾不待對人輒去
中丞沈約彈之云肆情運氣不顧朝典揚眉闊步直轡
高驅坐贖論時何點王思遠之徒請交並不降意自天
子至于侯伯未嘗與一人游卒於黃門郎子藉別有傳
祐族子融字元長曾祖弘宋太保自有傳祖僧達中書
舍人父道琰廬陵內史母臨川太守謝惠連女性敦敏
教融書學融少而警慧博涉有文才從叔儉謂人曰此
兒年四十名位自然及祖舉秀才晉安王南中郎版行

參軍累遷太子舍人融以父宦不達弱年便欲紹興家業啟武帝求自試遷祕書丞從叔儉初有儀同之授贈儉詩及書儉甚竒之笑謂人曰穰侯印詎可便解尋遷丹陽丞中書郎永明末武帝欲北伐使毛惠秀畫漢武北伐圖融好功名因此上疏開張北侵之議圖成上置琅邪城射堂壁上遊幸輒觀焉九年上幸華林園禊宴朝臣使融為曲水詩序文藻富麗當世稱之上以融才辯十一年使兼主客接魏使房景高宗并并見融年少

問主客年幾融曰五十之年久踰其半景高云在本朝
聞主客作曲水詩序勝於顏延年實願一見融乃示之
後日弁於瑤池堂謂融曰觀相如封禪以知漢武之德
今覽王生詩序用見齊主之盛融曰皇家盛明豈直比
蹤漢武更慙鄙製無以遠匹相如上以魏所獻馬不稱
使融問曰秦西冀北實多駿驥而魏主所送之馬駕駘
之不若將旦旦信誓有時而爽駟駟之牧不能復嗣弁
曰當是不習地土融曰周穆馬跡徧於天下若騏驎之

性因地而遷則造父之策有時而躓弁曰王主客何為
勤勤於千里融曰卿國既異其優劣聊復相訪若千里
斯至聖上當駕鼓車弁曰向意既須必不能駕鼓車也
融曰買死馬之骨亦以郭隗之故弁不能答融躁於名
利自恃人地三十內便望為公輔初為司徒法曹詣從
叔僧祐因遇沈昭略未相識昭略屢顧盼謂主人曰是
何年少融殊不平謂曰僕出於扶桑入於暘谷照耀天
下誰云不知而卿此問昭略云不知許事且食蛤蜊融

曰物以羣分方以類聚君長東隅居然應嗜此族其高
自標置如此及為中書郎入直中書省夜常撫案歎曰
為爾寂寂鄧禹笑人行逢朱雀桁開路人喧啾不能得
進又槌車壁歎曰大丈夫車中乃可無七尺車前豈可
乏八騶會魏軍動竟陵王子良於東府募人版融寧朔
將軍軍主融文辭捷速有所造作援筆可待子良特相
友好情分殊常晚節大習騎馬才地既華兼藉子良之
勢傾意賓客勞問周歎文武輻湊之招集江西傖楚數

百人並有幹用融特為謀主武帝病篤暫絕子良在殿內太孫未入融戎服絳衫於中書省閤口斷東宮仗不得進欲矯詔立子良詔草已立上重蘇朝事委西昌侯鸞梁武謂范雲曰左手據天下之圖右手刎其喉愚夫不為主上大漸國家自有故事道路籍籍將有非常之舉卿聞之乎雲不敢答俄而帝崩融乃處分以子良兵禁諸門西昌侯聞急馳到雲龍門不得進乃曰有勅召我仍排而入奉太孫登殿命左右扶出子良指麾音響

如鐘殿內無不從命融知子良不得立乃釋服還省歎
曰公誤我鬱林深忿融即位十餘日收下廷尉使中丞
孔稚珪為奏數其罪惡使融依條據答融頗自辯析不
肯引咎自融被收朋友部曲參問北寺相繼於道請救
於子良子良不敢救西昌侯固爭不得詔於獄賜死時
年二十七臨死歎曰我若不為百歲老母當吐一言融
意欲斥帝在東宮時過失也先是太學生會稽魏準以
才學為融所知既欲奉子良而準鼓成其事太學生虞

義丘國賓竊相謂曰竟陵才弱王中書無斷敗在眼中
矣及融誅召準入舍人省詰問遂懼而死舉體皆青時
人以為準膽破融有文集行於時

柳世隆字彥緒河東解人也伯父元景宋尚書令自有
傳父叔宗字雙鱗位建威參軍早卒世隆幼孤挺然自
立不與衆同雖門勢子弟獨修布衣之業及長好讀書
折節善彈琴涉獵文史音吐溫潤元景愛賞異於諸子
言於宋孝武得召見帝謂元景曰此兒將來復是三公

一人為西陽王撫軍法曹行參軍出為武威將軍上庸
太守帝謂元景曰卿昔以武威之號為隨郡今復以授
世隆使卿門世不乏三公也元景為前廢帝所殺世隆
以在遠得免泰始初四方反叛世隆於上庸起兵以應
宋明帝為孔道存所敗衆散逃隱道存購之甚急軍人
有貌相似者斬送之時世隆母郭妻閭並見繫襄陽獄
道存以所送首示之母見首悲情小歇而妻閭號咷方
甚竊謂郭曰今見不悲為人所覺唯當大慟以滅之世

隆竟以免後為太子洗馬與張緒王延之沈琰為君子之交累遷晉熙王安西司馬加寧朔將軍時武帝為長史與世隆相遇甚懽高帝之謀度廣陵也令武帝率衆同會都下世隆與長流參軍蕭景先等戒嚴待期事不行時朝廷疑憚沈攸之密為之防府州器械皆有素蓄武帝將下都劉懷珍白高帝曰夏口是兵衝要地宜得其人高帝納之與武帝書曰汝入朝當須文武兼資人與汝意合者委以後事世隆其人也武帝乃舉世隆自

代轉為武陵王前軍長史江夏內史行郢州事昇明元
年冬攸之反遣輔國將軍中兵參軍孫同等以三萬人
為前驅又遣司馬冠軍劉攘兵等二萬人次之又遣輔
國將軍中兵參軍王靈秀等分兵出夏口據魯山攸之
乘輕舸從數百人先大軍下住白螺洲坐胡牀以望其
軍有自驕色既至郢以郢城弱小不足攻攸之將去世
隆遣軍於西渚挑戰攸之果怒晝夜攻戰世隆隨宜拒
應衆皆披却武帝初下與世隆別曰攸之一旦為變雖

留攻城不可卒拔卿為其內我為其外乃無憂耳至是武帝遣軍主桓敬陳允叔苟元賓等八軍據西塞令堅壁以待賊疲慮世隆危急遣腹心胡元直潛使入郢城通援軍消息內外並喜郢城既不可攻而平西將軍黃回軍至西陽乘三層艦作羌胡伎汴流而進攸之素失人情本逼以威力初發江陵已有叛者至此稍多攸之大怒於是二人叛遣十人追並去不返劉攘兵射書與世隆請降開門納之攸之怒銜鬚咀之收攘兵兄子天

賜女壻張平慮斬之軍旅大散世隆乃遣軍副劉僧麟緣道追之攸之已死徵為侍中仍遷尚書右僕射封貞陽縣侯出為吳郡太守居母憂寒不衣絮高帝踐阼起為南豫州刺史加都督進爵為公上手詔司徒褚淵甚傷美之淵曰世隆事陛下在危盡忠居憂杖而後起立人之本二理同極加榮增寵足以厲風俗建元二年授右僕射不拜性愛涉獵啟高帝借祕閣書上給二千卷三年出為南兖州刺史加都督武帝即位加散騎常侍

世隆善卜別龜甲價至一萬永明初世隆曰永明九年
我亡亡後三年丘山崩齊亦於此季矣屏人命典籤李
黨取筆及高齒履題簾箔旌曰永明十一年因流涕謂
黨曰汝當見吾不見也遷護軍而衛軍王儉修下官敬
甚謹世隆止之儉曰將軍雖存弘眷其如王典何其見
重如此性清廉唯盛事墳典張緒問曰觀君舉措當以
清名遺子孫邪答曰一身之外亦復何須子孫不才將
為爭府如其才也不如一經光祿大夫韋祖征州里宿

德世隆雖已貴重每為之拜人或勸祖征止之答曰司馬公所為後生楷法吾豈能止之哉後授尚書左僕射湘州蠻動遣世隆以本官總督伐蠻仍為湘州刺史加都督至鎮以方畧討平之立邸治生為御史中丞庾杲之所奏詔不問復入為尚書左僕射不拜乃轉尚書令世隆少立功名晚專以談義自業善彈琴世稱柳公雙瑣為士品第一常自云馬稍第一清談第二彈琴第三在朝不干世務垂簾鼓琴風韻清遠甚獲世譽以疾遜

位拜左光祿大夫侍中永明九年卒詔給東園祕器贈
司空班劍二十人謚曰忠武世隆曉數術於倪塘創墓
與賓客踐履十往五往常坐一處及卒墓工圖墓正取
其坐處焉所著龜經祕要二卷行於世長子悅字文殊
少有清致位中書郎早卒謚曰恭世隆次子恢知名梁
代有傳

王晏字休默一字士彥琅邪臨沂人也伯祖鎮之宋宣
訓衛尉祖弘之仕晉為桓謙衛軍參軍棄官嘉遁宋初

徵辟並不就名附鎮之傳父普曜祕書監晏仕宋為建安國左常侍稍至車騎晉熙王燮安西版主簿武帝時為長史與晏相遇府轉鎮西版晏為記室沈攸之事難晏隨武帝鎮湓城時高帝威權雖重而衆情猶有疑惑晏便專心奉事軍旅書翰皆見委任性便僻漸見親待遷從事中郎常在二府參議機密建元初轉太子中庶子武帝在東宮專斷朝事多不聞啟晏慮及罪稱疾自疎武帝即位轉長史兼侍中意任如舊遷侍中祭酒遭

母喪起為司徒左長史晏父普曜藉晏勢多歷通官普
曜卒晏居喪有禮永明六年起為丹陽尹晏位任親重
朝夕進見言論政事自豫章王嶷尚書令王儉皆降意
以接之而晏每以疎漏被上呵責連稱疾久之上以晏
初須祿養轉為江州刺史晏固辭涕泣不願出留為吏
部尚書太子右率終以舊恩見寵時尚書令王儉雖貴
而疎晏既領選權行臺閣與儉頗不平儉卒禮官欲依
王導謚為文獻晏啟上曰導乃得此謚但宋來不加素

族出謂親人曰平頭憲事已行矣十一年為右僕射領
太孫右衛率武帝崩遺旨以尚書事付晏及徐孝嗣鬱
林即位轉左僕射及明帝議廢立晏便響應接奉延興
元年轉尚書令封曲江縣侯給鼓吹一部甲仗五十人
入殿時明帝形勢已布而莫敢先言蕭諶兄弟握兵權
遲疑未決晏頻三夜微步詣諶議時人以此窺之明帝
與晏於東府語及時事晏抵掌曰公常言晏怯今定何
如建武元年進號驃騎大將軍給班劍二十人又加兵

百人領太子少傅進爵為公以魏軍動給兵千人晏為人篤於親舊為世所稱至是自謂佐命惟新言論常非武帝故事衆始怪之明帝雖以事際須晏而心相疑後料簡武帝中詔得與晏手勅三百紙皆是論國家事永明中武帝欲以明帝代晏領選晏答曰鸞清幹有餘然不諳百氏恐不可居此職乃止及見此詔愈猜薄之帝初即位始安王遙光便勸誅晏帝曰晏於我有勲且未有罪遙光曰晏尚不能為武帝安能為陛下帝默然變

色時帝常遣心腹左右陳世範等出塗巷採聽異言由
是以晏為事晏性浮動志欲無慙自謂旦夕開府又望
錄尚書每謂人曰徐公應為令又和徐詩云槐序候方
調晏名位在徐前徐若三槐則晏不言自顯人或譏之
晏人望未重又與上素疎延興初雖以事計委任而內
相疑阻晏無防意既居朝端事多專決內外要職並用
周旋門義每與上爭用人數呼相工自視云當大貴與
客語好屏人上聞之疑晏欲反遂有誅晏之意有僉人

鮮于文粲與晏子德元往來密探朝旨告晏有異志又左右單景儁陳世範等采巫覡言啟上云晏懷異圖是時南郊應親奉景儁等告晏因此與武帝故主帥於道中竊發會虎犯郊壇帝愈懼未郊前一日上乃停行先報晏及徐孝嗣孝嗣奉旨而晏陳郊祀事大必宜自力上以景儁言似可信元會畢乃召晏於華林省誅之下詔顯其罪稱以河東王鉉識用微弱欲令守以虛器並令收付廷尉晏之為員外郎也父普曜齋前柏樹忽變

成梧桐論者以為梧桐雖有栖鳳之美而失後凋之節
及晏敗果如之又未敗前見屋桷子悉是大蛇就視之
猶木也晏惡之乃以紙裹桷子猶紙內搖動簌簌有聲
又於北山廟答賽夜還晏醉部伍人亦飲酒羽儀錯亂
前後十餘里中不復禁制識者云此不復久也未幾而
敗晏子德元有意尚位車騎長史德元初名湛武帝曰
劉湛江湛並不善終此非佳名也晏乃改之至是及誅
晏弟誡位少府卿勅未登黃門郎不得畜女伎誡與射

聲校尉陰元智坐畜妓俱免官禁錮十年餘勅特原詔

久之拜廣州刺史晏誅上遣殺之晏從父弟思遠父羅

雲平西長史思遠八歲而孤祖弘之及外祖新安太守

羊敬元並栖退高尚故思遠少無仕心宋建平王景素

辟為南徐州主簿深見禮遇景素被誅左右離散思遠

親視殯葬手種松柏與廬江何昌寓沛郡劉璉上表理

之事感朝廷景素女廢為庶人思遠分衣食以相資贍

年長為備筭總訪求素對傾家送遣建元初歷竟陵王

司徒錄事參軍太子中舍人文惠太子與竟陵王子良
素好士並蒙賞接思遠求出為遠郡除建安內史長兄
思元卒思遠友于甚至表乞自解不許及祥日又固陳
武帝乃許之仍除中書郎大司馬諮議詔舉士竟陵王
子良薦思遠及吳郡顧嵩之陳郡殷叡時邵陵王子貞
為吳郡除思遠為郡丞以本官行郡事論者以為得人
後拜御史中丞臨海太守沈昭略贓私思遠依事劾奏
明帝及思遠從兄晏昭略叔父文季並請止之思遠不

從案事如故建武中遷吏部郎思遠以從兄晏為尚書
令不欲並居內臺權要之職上表固辭乃改授司徒左
長史初明帝廢立之際思遠謂晏曰兄荷武帝厚恩今
一旦贊人如此事彼或可以權計相須未知兄將來何
以自立若及此引決猶可保全門戶不失後名晏曰方
噉粥未暇此事及拜驃騎會子弟謂思遠兄思微曰隆
昌之末阿戎勸吾自裁若從其語豈有今日思遠遽應
曰如阿戎所見猶未晚也晏既不能謙退位處朝端事

多專斷內外要職並用門生帝外迹甚美內相疑異思
遠謂曰時事稍異兄覺不凡人多拙於自謀而巧於謀
人晏不答思遠退晏方歎曰天下人遂勸人自殺旬日
而晏及禍明帝後知思遠有此言謂江祐曰王晏早用
思遠語當不至此思遠立身簡潔諸客有詣己者輒使
人先密覘視衣服垢穢方便不前形儀新楚乃與促膝
雖然及去之後猶令二人交帚拂其坐處明帝從祖弟
季敞性甚豪縱使詣思遠令見禮度都水使者季珪之

常曰見王思遠終日匡坐不妄言笑簪帽衣領無不整潔便憶丘明士見明士蓬頭散帶終日酣醉吐論縱橫唐突卿宰便復憶見思遠言其兩反也上既誅晏遷思遠為侍中掌優策及起居注卒年四十九贈太常諡曰貞子思遠與顧嵩之友善嵩之卒後家貧思遠迎其妻兒經卹甚至舄之字士明少孤好學有義信位太子中舍人兼尚書左丞

徐孝嗣字始昌東海郟人也祖湛之宋尚書僕射父聿

之著作郎並為元凶所殺湛之附載其伯祖司空羨之

傳孝嗣在孕而祖父被害母年少欲更行不願有子自

牀投地者無算又以擣衣杵舂其腰并服墮胎藥而胎

愈堅及生故小字遺奴幼而挺立風儀端雅八歲襲祖

爵枝江縣公見宋孝武升階流涕迄于就席帝甚愛之

尚康樂公主拜駙馬都尉泰始中以登殿不著韎為書

侍御史蔡準所奏罰金二兩孝嗣姑適東莞劉舍舍兄

藏為尚書左丞孝嗣往詣之藏退謂舍曰徐郎是令僕

人三十餘可知汝宜善自結昇明中為高帝驃騎從事
中郎帶南彭城太守轉太尉諮議參軍建元初國除累
遷長史兼侍中善趨步閑容止與太宰褚淵相埒尚書
令王儉謂人曰徐孝嗣將來必為宰相轉御史中丞武
帝謂儉曰誰可繼卿者儉曰臣東都之日其在徐孝嗣
乎出為吳興太守儉贈孝嗣四言詩曰方軌叔茂追清
彥輔柔亦不茹剛亦不吐時人以比蔡子尼之行狀也
在郡有能名會王儉亡上徵孝嗣為五兵尚書其年上

勅儀曹令史陳淑等撰江左以來儀典令詔受孝嗣明
年遷太子詹事從武帝幸方山上曰朕經始此山之南
為離宮之所應有邁靈丘靈丘山湖新林苑也孝嗣答
曰繞黃山歛牛首乃盛漢之事今江南未廣民亦勞止
願陛下少更留神上乃止竟陵王子良甚善之歷吏部
尚書石軍將軍領太子左衛率臺閣事多以委之武帝
崩遺詔轉尚書右僕射隆昌元年為丹陽尹明帝謀廢
鬱林遣左右莫智明以告孝嗣孝嗣奉旨無所釐替即

還家草太后令明帝入殿孝嗣戎服隨後鬱林既死明
帝頒太后令孝嗣於袖中出而奏之帝大悅時議悉誅
高武子孫孝嗣堅保持之故得無恙以廢立功封枝江
縣侯甲仗五十人入殿轉左僕射明帝即位加中軍大
將軍以定策勲進爵為公給班劍二十人加兵百人舊
拜三公乃臨軒至是帝特詔與陳顯達王晏並臨軒拜
受時王晏為令人情物望不及孝嗣晏誅轉尚書令孝
嗣愛好文學器量弘雅不以權勢自居建武之世恭已

自保朝野以此稱之初孝嗣在率府晝卧齋北壁下夢

兩童子遽云移公牀孝嗣驚起聞壁有聲行數步而壁

崩壓牀建武四年即本號開府儀同三司孝嗣聞有詔

斂容謂左右曰吾德慙古人位登袞職將何以堪之明

君可以理奪必當死請若不獲命正當角巾丘園待罪

家巷耳固讓不受命時連年魏軍動國用虛乏孝嗣表

立屯田帝已寢疾兵事未已竟不行帝疾甚孝嗣入居

禁中臨崩受遺託重申開府之命加中書監永元初輔

政自尚書下省出住宮城南宅不得還家帝失德稍彰
孝嗣不敢諫諍及江祐見誅內懷憂恐然未嘗表色始
安王遙光反衆懷惶惑見孝嗣入宮乃安然羣小用事
不能制也時孝嗣以帝終亂天常與沈文季俱在南掖
門欲要文季以門為應四五目之文季輒亂以他語孝
嗣乃止進位司空固讓求解丹陽尹不許孝嗣文人不
顯同異名位雖大故得未及禍虎賁中郎將許進有膽
智陳說事機勸行廢立孝嗣遲疑久之謂必無用干戈

理須少主出遊閉城門召百僚集議廢之雖有此懷終不能決羣小亦稍憎孝嗣勸帝除之其冬召孝嗣入華林省遣茹法珍賜藥孝嗣容色不異謂沈昭略曰始安事吾欲以門應之賢叔若同無今日之恨少能飲酒藥至斗餘方卒時年四十七乃下詔言誅之于時凡被殺者皆取其蟬冕剝其衣服衆情素敬孝嗣得無所侵長子演尚武帝女武康公主位太子中庶子第三子況尚明帝女山陰公主并拜駙馬都尉俱見殺孝嗣之誅衆

人懼無敢至者唯會稽魏溫仁奔赴以私財營喪事當時稱之初孝嗣之復故封也使故吏吳興丘叡筮之當傳幾世卦成叡曰恐不終尊身孝嗣容色甚惡徐曰緣有此慮故令卿決之耳中興元年和帝詔贈太尉二年改葬宣德太后詔增班劍四十人加羽葆鼓吹謚曰文忠改封餘干縣公子緄緄子君蒨列在梁史

王琨琅邪臨沂人宋侍中護軍將軍華之從父弟也父懌不辨菽麥時以為殷道矜之流人無肯與婚以獫婢

恭心侍之遂生琨初名崑崙懌後娶南陽樂元女無子
故即以琨為名立以為嗣琨少謹篤為從伯司徒謚所
愛宋武帝初為桓修參軍修待帝厚後帝以事計圖修
猶懷昔顧使王華訪素門嫁其二女華為琨娶大女以
小女適潁川庾敬虔亦是舊族除琨郎中駙馬都尉奉
朝請先是琨伯父廩得罪晉世諸子並從誅唯華得免
華宋世貴盛以門戶衰弱提攜琨恩若同生為之延譽
歷位宣城義熙太守皆以廉約稱華終又託之宋文帝

故琨屢居清顯孝建中為尚書吏部郎吏曹選局貴要
多所屬請琨自公卿下至士大夫例為用兩門生江夏
王義恭嘗屬琨用二人後復遣屬琨不從出為建威將
軍平越中郎將廣州刺史南土沃實在任者常致巨富
世云廣州刺史但經城門一過便得三千萬也琨無所
取納表獻祿俸之半州鎮舊有鼓吹又啟輸還及罷任
孝武知其清問還資多少琨曰臣買宅百三十萬餘物
稱之帝悅其對後為歷陽內史上以琨忠實徙為寵子

新安王北中郎長史再歷度支尚書加光祿大夫初華
孫長襲華爵新建縣侯嗜酒多愆失琨表以長將傾基
緒請以長小弟佟嗣庶不墜素風從之琨後出為吳郡
太守遷中領軍坐在郡用朝舍錢三十六萬營餉二宮
諸王及作絳襖奉獻軍用左遷光祿大夫尋加太常及
金紫加散騎常侍廷尉虞繅議社稷合一神琨案舊糾
駁不為屈時繅見寵朝廷歎琨彊正明帝臨崩出為會
稽太守加都督坐訟竟囚降為冠軍順帝即位進右光

祿大夫順帝遜位百僚陪列琨在晉世已為郎中至是
攀畫輪獼尾慟泣曰人以壽為懽老臣以壽為戚既不
能先驅螻蟻頻見此事百官人人雨淚高帝即位領武
陵王師加侍中時王儉為宰相屬琨用東海郡吏琨使
人謂曰語郎三臺五省皆是郎用人外方小郡當乞寒
賤省官何容復奪之遂不過其事尋解王師及高帝崩
琨聞國諱牛不在宅去臺數里遂步行入宮朝士皆曰
故宜待車有損國體琨曰今日奔赴皆自應爾遂得病

卒時年八十四贈金紫光祿大夫琨謙恭謹慎老而不
渝家人雜事皆手自操執公事朝會必夙夜早起簡閱
衣裳料數冠幘如此數四輕薄子以此笑之大明中尚
書僕射顏師伯豪貴下省設女樂琨時為度支尚書要
琨同聽傳酒行炙皆悉內妓琨以男女無親授之禮傳
行每至令置牀上回面避之然後取畢又如此坐上莫
不撫手嗤笑琨容色自若師伯後為設樂邀琨琨不往
中領軍劉劭晚節有栖退志表求東陽郡尚書令袁粲

以下莫不贊美之。琨曰：「永初景平唯謝晦殷景仁為中領軍元嘉有到彥之若以為人望才譽勛不及也。近聞加侍中已為快快便求東陽臣恐赤松子房未易輕擬其鯁直如此然性儉於財用設酒不過兩盃輒云此酒難遇鹽豉薑蒜之屬並挂屏風酒漿悉置牀下內外有求琨手自賦之。景和中討義陽王昶六軍戒嚴應須紫櫛左右欲營辦琨曰：「元嘉初征謝晦有紫櫛在匣中不須更作檢取果得焉而避諱過甚父名懌母名恭心並不」

得犯焉時咸謂矯枉過正

張敬兒南陽冠軍人也父醜為郡將軍官至節府參軍
敬兒少便弓馬有膽氣好射虎發無不中南陽新野風
俗出騎射而敬兒尤多膂力稍官至寧蠻行參軍隨郡
人劉胡伐襄陽諸山蠻深入險阻所向皆破又擊胡陽
蠻官軍引退敬兒單馬在後賊不能抗山陽王休祐鎮
襄陽求善騎射士敬兒及襄陽俞湛應選敬兒善事人
遂見寵為長兼行參軍泰始初隨府轉驃騎參軍署中

兵參軍領軍討義嘉賊與劉胡相拒於鵲尾洲啟明帝
乞本郡事平除南陽太守敬兒之為襄陽府將也家貧
每休暇傭賃自給嘗為城東吳泰家擔水通泰家所愛
婢事發將被泰殺逃賈人棺材中以蓋加上乃免及在
鵲尾洲啟明帝云泰以絲助雍州刺史袁顗為弩弦黨
同為逆若事平之日乞其家財帝許之至是收籍吳氏
唯家人保身得出僮役財貨直數千萬敬兒皆有之先
所通婢即以為妾後為越騎校尉桂陽王休範事起隸

高帝頓新亭賊矢石既交休範白服乘輿往勞樓下敬
兒與黃回白高帝求詐降以取之高帝曰卿若能辦事
當以本州相賞敬兒相與出城南放仗走大叫稱降休
範喜召至輿側回陽致高帝密意休範信之回目敬兒
敬兒奪休範防身刀斬之左右數百人皆散敬兒馳馬
持首歸新亭除驍騎將軍加輔國將軍高帝置酒謂敬
兒曰非卿之功無今日安高帝以敬兒人位既輕不欲
便使為襄陽重鎮敬兒求之不已乃微動高帝曰沈攸

之在荊州公知其欲何所作不出敬兒以防之恐非公之利也帝笑而無言乃以為雍州刺史加都督驍騎將軍如故封襄陽侯部泊沔口敬兒乘舩艦過江詣晉熙王燮中江遇風船覆左右丁壯者各泅走餘二小史沒舩下求救敬兒敬兒兩腋挾之隨船仰得在水上如此翻覆行數十里方得迎接失所持節更給之沈攸之聞敬兒上遣人伺覘見雍州迎軍儀甚盛慮見掩襲密自為備敬兒至鎮厚結攸之信饋不絕得其事迹密白高

帝攸之得高帝書翰論選用方伯密事輒示敬兒以為
反間敬兒終無二心敬兒又與攸之司馬劉攘兵情款
及蒼梧廢敬兒疑攸之當因此起兵密以問攘兵攘兵
無所言唯寄馬銙一隻敬兒乃為之備昇明元年冬攸
之反遣使報敬兒敬兒勞接周至為設食訖列仗於聽
事前斬之遂集部曲頃攸之下當襲江陵敬兒告變使
至高帝大喜進號鎮軍將軍改督時攸之至郢城敗走
其子元琰與兼長史江乂別駕傅宣等還江陵敬兒軍

至白水元琰聞城外鶴唳謂是叫聲恐懼欲走其夜又
宣開門出奔城潰元琰奔寵洲見殺敬兒至江陵誅攸
之親黨沒入其財數千萬善者悉以入私送臺省者百
不一焉攸之於湯渚村自經死居人送首荊州敬兒使
楫擎之蓋以青織徇諸市郭乃送建鄴進爵為公敬兒
在雍州貪殘人間一物堪用莫不奪取於襄陽城西起
宅聚物貨宅大小殆侔襄陽又欲移羊叔子墮淚碑於
其處置臺綱紀諫曰此羊太傅遺德不宜遷動敬兒曰

羊太傅是誰我不識及齊受禪轉侍中中軍將軍遷散騎常侍車騎將軍置佐史高帝崩遺詔加開府儀同三司於家敬兒竊泣曰官家大老天子可惜太子年少向我所不及也及拜王敬則戲之呼為褚淵敬兒曰我馬上所得終不能作華林閤勲也敬則甚恨焉初敬兒微時有妻毛氏生子道門而鄉里尚氏女有色貌敬兒悅之遂棄毛氏而納尚氏為室及居三司尚氏猶居襄陽宅慮不復外出乃迎家口悉下至都啟武帝不蒙勞問

敬兒心自疑及袁崇祖死愈恐懼性好卜術信夢尤甚
初征荊州每見諸將帥不遑有餘計唯叙夢云未貴時
夢居村中社樹欸高數十丈及在雍州又夢社樹直上
至天以此誘說部曲自云貴不可當由是不自測量無
知又使於鄉里為謠言使小兒輩歌曰天子在何處宅
在赤谷口天子是阿誰非猶如是狗敬兒家在冠軍宅
前有地名赤谷既得開府又望班劍語人曰我車邊少
班蘭物敬兒長自荒遠少習武事既從容都下又四方

寧靖益不得志其妻尚氏亦曰吾昔夢一手熱如火而君得南陽郡元徽中夢一髀熱如火君得本州建元中夢半體熱尋得開府今復舉體熱矣以告所親言其妻初夢次夢又言今舉體熱矣閭人聞其言說之事達武帝敬兒又遣使與蠻中交關武帝疑有異志永明元年勅朝臣華林八關齋於坐收敬兒初左右雷仲顯常以盈滿誠敬兒不能從至知有變抱敬兒泣敬兒脫冠貂投地曰用此物誤我及子道門道暢道休並伏誅少子

道慶見宥後數年上與豫章王疑三日曲水內宴有舩
舩船流至御坐前覆沒上由是言及敬兒悔殺之敬兒
始不識書及為方伯乃習學讀孝經論語初徵為護軍
乃潛於密室中屏人學揖讓答對空中俯仰妾侍竊窺
笑焉將拜三司謂其妻嫂曰我拜後府開黃閣因口自
為鼓聲初得鼓吹羞便奏之又於新林姥廟為妾祈子
祝神口自稱三公其鄙俚如此始其母於田中卧夢犬
子有角舐之已而有娠生敬兒故初名苟兒又生一子

因苟兒之名復名猪兒宋明帝嫌苟兒名鄙改為敬兒
故猪兒亦改為恭兒位正員外郎謝罪歸本縣常居上
保村不肯出仕與居人不異與敬兒愛友甚篤及聞敬
兒敗走入蠻後首出原其罪

王敬則臨淮射陽人也僑居晉陵南沙縣父縣小吏母為
女巫常語人云敬則生而胞衣紫色應得鳴鼓角人笑
之曰得吹角可矣敬則年長兩腋下生乳各長數寸嘗
夢騎五色師子年二十餘善拍張補刀戟左右宋前廢

帝使之跳刀高出白虎幢五六尺接無不中仍撫髀拍
張補俠轂隊主領細鎧左右與壽寂之弑前廢帝明帝
即位以為直閭將軍封重安縣子敬則少時於草中射
獵有蟲如烏豆集其身摘去乃脫脫處皆流血詣道士
卜之云此封侯之瑞也敬則喜故出都自劾補暨陽令
初敬則行至暨陽陸主山下宗侶十餘船同發敬則船
獨不進乃令人入水推之見一烏漆棺敬則祝曰爾非
凡器若是吉徵使船速進吾富貴當改葬爾船乃去須

與入縣收棺葬之縣有一部劫居山中為民患敬則遣人致意劫帥令出首當相申論郭下廟神甚酷烈百姓信之敬則引神為誓必不相負帥出敬則於廟中設酒會劫帥於坐收縛之曰吾啟神若負誓還神十牛今不得違誓即殺十牛解神遂斬諸劫百姓悅之元徽初隨高帝拒桂陽賊於新亭敬則與陳顯達高道慶乘舸楫於江中迎戰大破賊水軍禁其舟艦事寧帶南泰山太守右俠穀主安成王參軍蒼梧狂虐左右不自保敬則

以高帝有威名歸誠奉事每下直輒往領軍府夜著青衣扶匐道路為高帝聽察蒼梧去來高帝令於殿內伺機既而楊玉夫等將蒼梧首投敬則敬則馳謁高帝帝乃戎服入宮至永明門門郎疑之不開門高帝呼之急乃開敬則隨帝入殿門明日西貴集議敬則拔白刃在高帝側跳躍曰誰敢作同異者昇明元年遷輔國將軍領臨淮太守知殿內宿衛兵事沈攸之事起進敬則冠軍將軍高帝入守朝堂袁粲起兵召領軍劉韞直閤將軍

軍卜伯興等於宮內相應戒嚴將發敬則開關掩襲皆殺之殿內竊發盡平敬則之力也政事無大小帝並以委之敬則不識書但能下名然善決斷齊臺建為中領軍高帝將受禪材官薦易太極殿柱順帝避土不肯出宮遜位明日當臨軒順帝又逃宮內敬則將輿入迎帝啓譬令出引令升車順帝不肯即上收淚謂敬則曰欲見殺乎敬則答曰出居別宮爾官先取司馬家亦復如此順帝泣而彈指曰唯願後身生生世世不復與天王

作因緣宮內盡哭聲徹於外順帝拍敬則手曰必無過
慮當餉輔國十萬錢建元元年出為都督南充州刺史
封尋陽郡公加妻懷氏爵為尋陽國夫人二年魏軍攻
淮泗敬則恐委鎮還都百姓皆辦嚴奔走上以其功臣
不問以為都官尚書遷吳興太守郡舊多剽掠有十數
歲小兒於路取遺物敬則殺之以徇自此路不拾遺郡
無劫盜又嘗得一偷召至前鞭之使偷身長掃街路久
之乃令偷舉他偷自代諸偷恐為所識皆逃走境內以

清仍入烏程市過見屠肉枿嘆曰吳興昔無枿是我少
時在此所作也召故人飲酒說平生不以為屑也遷護
軍以家為府三年以改葬去職詔贈其母尋陽國太夫
人改授侍中撫軍高帝崩遺詔敬則以本官領丹陽尹
尋遷會稽太守加都督永明二年給鼓吹一部會土邊
帶湖海人丁無士庶皆保塘役敬則以功力有餘悉評
斂為錢送臺庫以為便宜上許之三年進號征東將軍
宋廣州刺史王翼之子妾路氏酷暴殺婢媵翼之子法

朗告之敬則付山陰獄殺之路氏家訴為有司所奏山陰令劉岱坐棄市刑敬則入朝上責之曰人命至重誰下意殺之都不啟聞敬則曰是臣愚意臣知何物料法見背後有節便言應得殺人劉岱亦引罪上赦之敬則免官以公領郡後與王儉俱即本號開府儀同三司時徐孝嗣於崇禮門候儉因嘲之曰今日可謂連璧矣儉曰不意老子遂與韓非同傳人以告敬則敬則欣然曰我本南沙縣吏微幸得細鎧左右遭風雲以至於此遂

與王衛軍同日拜三公復何恨了無恨色朝士以此多
之十一年授司空敬則名位雖達不以富貴自遇初為
散輩使魏於北館種楊柳後員外郎虞長曜使北還敬
則問我昔種楊柳今若大小長曜曰虜中以為甘棠武
帝令羣臣賦詩敬則曰臣幾落此奴度上問之對曰臣
若解書不過作尚書都令史耳那得今日敬則雖不大
識書而性甚警黠臨郡令省事讀辭下教制決皆不失
理明帝輔政密有廢立意隆昌元年出敬則為會稽太

守加都督海陵王立進位太尉明帝即位為大司馬臺使拜授日雨大洪注敬則文武皆失色一客旁曰公由來如此昔拜丹陽尹吳興時亦然敬則大悅曰我宿命應得雨乃引羽儀備朝服導引出聽事拜受意猶不自得吐舌久之帝既多殺害敬則自以高武舊臣心懷憂懼帝雖外厚為其禮而內相疑備數訪問敬則飲食體幹聞其衰老且以居內地故得少安後遣蕭坦之將齋仗五百人行晉陵敬則諸子在都憂怖無計上知之問

計於梁武梁武曰敬則豎夫易為感唯應錫以子女玉帛厚其使人如斯而已上納之吳人張思祖敬則謀主也為府司馬頻銜使上偽傾意待之以為游擊將軍遣敬則子仲雄入東安慰之仲雄善彈琴江左有蔡邕焦尾琴在主衣庫上勅五日一給仲雄仲雄於御前鼓琴作懊儂曲歌曰常歎負情儂郎今果行許又曰君行不淨心那得惡人處帝愈猜愧永泰元年帝疾屢經危殆以張瓌為平東將軍吳郡太守置兵佐密防敬則內外

傳言當有異處分敬則聞之竊曰東今有誰祇是欲平
我耳東亦何易可平吾終不受金甌金甌謂鵠酒也諸
子怖懼第五子幼隆遣正員將軍徐嶽以情告徐州行
事謝朓為計若同者當走報敬則朓執嶽馳啟之敬則
承局參軍徐庶家在京口其子密以報庶庶以告敬則
五官王公林公林敬則族子常所委信公林勸敬則急
送啟賜免死單舟星夜還都敬則曰若爾諸郎要應有
信且忍一夕其夜呼僚佐文武携蒲賭錢謂衆曰卿諸

人欲令我作何計莫敢先答防閣丁興懷曰官祇應作爾敬則不語明旦召山陰令王詢臺侍御史鍾離祖願敬則橫刀跂坐問詢等發丁可得幾人庫見有幾錢物詢祖願對並乖旨敬則怒將出斬之王公林又諫敬則曰官詎不更思敬則唾其面曰小子我作事何關汝小子乃起兵招集配衣一二日便發欲劫前中書令何允還為尚書令長史王弄璋司馬張思祖止之曰何令高蹈必不從不從便應殺之舉大事先殺朝賢事必不濟

乃率實甲萬人過浙江謂曰應須作檄思祖曰公今自還朝何用作此乃止朝廷遣輔國將軍前軍司馬左興盛直閣將軍馬軍主胡松三千餘人築壘於曲阿長岡尚書左僕射沈文季為持節都督屯湖頭備京口路敬則以舊將舉事百姓擔簦荷鍤隨逐之十餘萬衆至武進陵口慟哭乘肩輿而前遇興盛山陽二砦盡力攻之官軍不敵欲退而圍不開各死戰胡松領馬軍突其後白丁無器仗皆驚散敬則大叫索馬再上不得上興盛

軍容表文廣斬之傳首京師是時上疾已篤敬則倉卒東起朝廷震懼東昏侯在東宮議欲叛使人上屋望見征虜亭失火謂敬則至急裝欲走有告敬則者敬則曰檀公三十六策走是上計汝父子唯應急走耳蓋諺譏檀道濟避魏時事也敬則之來聲勢甚盛凡十日而敗時年六十四朝廷漆其首藏在武庫至梁天監元年其故吏夏侯亶始表請收葬許之

陳顯達南彭城人也宋景和中以軍功封彭澤子位羽

林監濮陽太守隸高帝討桂陽賊於新亭壘劉劭大桁
敗賊乘勝進至杜姥宅高帝遣顯達自查浦渡淮緣石
頭北道入屯東堂宮中乃安顯達出杜姥宅大戰於宣
陽津陽門大破之賊矢中左目拔箭而鏃不出地黃村
潘嫗善禁先以釘釘柱嫗禹步作氣釘即時出乃禁顯
達目中鏃出之事平封彭城侯再遷平越中郎將廣州
刺史加都督沈攸之事起顯達遣軍援臺長史到遁司
馬諸葛導勸顯達保境蓄衆密通彼此顯達於坐手斬

之遣表疏歸心高帝事平拜大司馬高帝即位拜護軍將軍帝後御膳不宰牲顯達上蒸熊一盤上即以充飯後拜都督益州刺史武帝即位進號鎮西將軍益部山險多不賓服大度村獠前後刺史不能制顯達遣使責其祖賤獠帥曰兩眼刺史尚不敢調我遂殺其使顯達分部將吏聲將出獵夜往襲之男女無少長皆斬之自此山夷震服永明二年徵為侍中護軍將軍顯達累任在外經高帝之憂及見武帝流涕悲咽上亦泣心甚嘉

之八年為征南大將軍江州刺史給鼓吹顯達謙厚有智計自以人微位重每遷官常有愧懼之色有子十餘人誠之曰我本志不及此汝等勿以富貴陵人家既豪富諸子與王敬則諸兒並精車牛麗服飾當世快牛稱陳世子青王三郎烏呂文顯折角江瞿曇白鼻而皆集陳舍顯達知此不悅及子休尚為郢府主簿過九江拜別顯達曰凡奢侈者鮮有不敗麀尾蠅拂是王謝家物汝不須捉此自遂即取於前毀燒之其靜退如此豫廢

鬱林之勲延興元年為司空進爵為公明帝即位進太尉封鄱陽郡公加兵二百人給油絡車後以太尉封鄱陽公為三公事而職典連率人以為格外三公上欲悉除高武諸孫微言問顯達答曰此等豈足介慮上乃止顯達建武世心懷不安深自貶匿車乘朽敗導從鹵簿皆用羸小不過十人侍宴酒後啟上借枕帝令與之顯達撫枕曰臣年已老富貴已足唯少枕枕死特就陛下乞之上失色曰公醉矣以年老告退不許永泰元年魏

寇雍州乃遣顯達北討永元元年顯達督平北將軍崔
慧景衆軍四萬圍南鄉界馬圈城去襄陽三百里攻之
四十日魏軍食盡噉死人肉及樹皮魏軍突走斬獲千
計顯達入據其城遣軍主莊丘黑進取南鄉縣魏孝文
帝自領十餘萬騎奄至兵甚急軍主崔恭祖胡松以烏
布幔盛顯達數人擔之出均水口臺軍緣道奔退死者
三萬人顯達素有威聲著於蠻虜至是大損喪焉御史
中丞范岫奏免顯達官顯達又表解職不許求降號又

不許以為江州刺史鎮盆城初王敬則事起始安王遙
光啓明帝慮顯達為變欲追軍還事平乃寢顯達亦懷
危怖及東昏立彌不樂還都得此授甚喜尋加領征南
大將軍給三望車顯達聞京師大相殺戮徐孝嗣等皆
死傳聞當遣兵襲江州顯達懼禍十一月十五日舉兵
欲直襲建鄴以掩不備又遙指郢州刺史建安王寶寅
為主朝廷遣後軍將軍胡松等據梁山顯達率衆數千
人發尋陽與戰於采石大破松等京邑震恐十二月潛

軍渡取石頭北上襲宮城宮掖大駭閉門守備遇風失
曉顯達馬稍從步軍數百人於西州前與臺軍戰再合
大勝稍折手猶殺十餘人官軍繼至顯達不能抗退走
至西州後烏榜村騎官趙潭注稍刺落馬斬之於籬側
血涌湔籬似淳于伯之被刑也時年七十三顯達在江
州遇疾不療尋而差意甚不悅是冬連大雪梟首於朱
雀而雪不集諸子皆伏誅顯達長史庾弘遠字士操潁
川鄆陵人宋吏部尚書炳之之子也清寔有士譽顯達

敗斬於朱雀舫將刑索帽著之曰子路結纓吾不可以
不冠而死謂看者曰吾非賊乃是義兵為諸君請命爾
陳公舉事太輕若用吾言天下將免塗炭弘遠子子曜
年十四抱持父乞代命遂并斬之

崔慧景字君山清河東武城人也祖構奉朝請父系之
州別駕慧景少有志業仕宋為長水校尉高帝在淮陰
慧景與宗人祖思同時自結及高帝受禪封安樂縣子
為都督梁南秦二州刺史永明四年為司州刺史母喪

詔起復本任慧景每罷州輒傾資奉獻動數百萬武帝
以此嘉之十年為都督豫州刺史鬱林即位慧景以少
主新立密與魏通朝廷疑之明帝輔政遣梁武帝至壽
春安慰之慧景密啓送誠勸進建武四年為度支尚書
領太子左率東昏即位為護軍時輔國將軍徐世標專
權號令慧景備員而已帝既誅戮將相舊臣皆盡慧景
自以年宿位重轉不自安及裴叔業以壽陽降魏即授
慧景平西將軍假節侍中護軍如故率軍水路征壽陽

軍頓白下將發帝長圍屏除出琅邪城送之帝戎服坐樓上召慧景騎進圍內無一人自隨裁交數言拜辭而去慧景出至白下甚喜曰此頸非復小豎等所折也子覺為直閣將軍慧景密與之期時江夏王寶元鎮京口聞慧景北行遣左右余文興說之曰朝廷任用羣小猜害忠賢江劉徐沈君之所見身雖魯衛亦不知滅亡何時君今段之舉有功亦死無功亦死欲何求所免機不可失今擁彊兵北取廣陵收吳楚勁卒身舉州以相應

取大功如反掌耳慧景常不自安聞言響應于時廬陵王長史蕭寅司馬崔恭祖守廣陵城慧景以寶元事告恭祖恭祖先無宿契口雖相和心實不同還以事告寅共為閉城計寅心謂恭祖與慧景同謂曰廢昏立明人情所樂寧可違拒恭祖猶執不同俄而慧景至恭祖閉門不敢出慧景知其異已泣數行而去中兵參軍張慶延明嚴卿等勸慧景襲取廣陵及密遣軍主劉靈運間行突入慧景俄繼至遂據其城子覺至仍使領兵襲京

口寶元本謂大軍并來及見人少極失所望拒覺擊走之恭祖及覺精兵八千濟江恭祖心本不同反至蒜山欲斬覺以軍降京口事既不果而止覺等軍器精嚴柳燈沈佖等謂寶元曰崔護軍威名既重乃誠可見既已脣齒忽中道立異彼以樂歸之衆亂江而濟誰能拒之於是登北固樓並千蠟燭為烽火舉以應覺帝聞變以右衛將軍左興盛假節都督下水陸衆軍慧景停二日便率大衆一時俱濟江趨京口寶元仍以覺為前鋒恭

祖次之慧景領大都督為衆軍節度東府石頭白下新
亭諸城皆潰左興盛走不得入宮逃淮渚荻船中慧景
禽殺之慧景稱宣德皇后令廢帝為吳王時柳燈別推
寶元崔恭祖為寶元羽翼不復承奉慧景嫌之巴陵王
昭胄先逃人間出投慧景意欲向之故猶豫未知所立
此聲頗泄燈恭祖始貳於慧景又恭祖勸慧景射火箭
燒北掖樓慧景以大事垂定後若更造費用功多不從
其計性好談義兼解佛理頓法輪寺對客高談恭祖深

懷怨望先是衛尉蕭懿為豫州刺史自歷陽步道征壽陽帝遣密使告之懿率軍主胡松李居士等自采石濟岸頓越城舉火臺城中鼓叫稱慶恭祖先勸慧景遣二千人斷西岸軍令不得度慧景以城旦夕降外救自然應散不許恭祖請擊義師又不許乃遣子覺將精甲數千人渡南岸義師昧旦進戰覺大敗慧景人情離沮恭祖頓軍興皇寺於東宮掠得女妓覺來逼奪由是忿恨其夜崔恭祖與驍將劉靈運詣城降慧景乃將腹心數

人潛去欲北渡江城北諸軍不知猶以為拒戰城內出
盪殺數百人慧景餘衆皆奔慧景圍城凡十二日軍旅
散在都下不為營壘及走衆於道稍散單馬至蟹浦投
漁人太叔榮之榮之故為慧景門人時為蟹浦戍謂之
曰吾以樂賜汝汝為吾覓酒既而為榮之所斬以頭內
鮑籃中擔送都恭祖者慧景宗人驍果便馬稍氣力絕
人頻經軍陣討王敬則與左興盛軍容袁文曠爭敬則
首訴明帝曰恭祖禿馬絳衫手刺倒敬則故文曠得斬

其首以死易勲而見枉奪若失此勲當刺殺左興盛帝
以其勇健謂興盛曰何容令恭祖與文曠爭功慧景平
後恭祖繫尚方少時殺之覺亡命為道人見執伏法覺
弟偃年十八便身長八尺博涉書記善蟲篆為始安內
史藏竄得免和帝西臺立以為寧朔將軍中興元年詣
公車尚書申寃言多指斥尋下獄死先是東陽女子婁
逞變服詐為丈夫粗知圍碁解文義徧游公卿仕至揚
州議曹從事事發明帝驅令還東逞始作婦人服而去

歎曰如此之伎還為老嫗豈不惜哉此人妖也陰而欲為陽事不果故泄敬則遙光顯達慧景之應也

李安人蘭陵承人也祖嶷衛軍將軍父欽之薛令安人少有大志嘗拊髀歎曰大丈夫處世富貴不可希取三將五校何難之有隨父在縣宋元嘉中縣被魏克父沒于魏安人尋率部曲自拔南歸明帝時稍遷武衛將軍晉安王子勛反遣領水軍拒之累戰皆捷又擊鵲尾洲大破之事平明帝大會新亭樓勞諸軍主擣蒲共賭安

人五擲皆盧帝大驚因謂安人曰卿面方如田封侯狀也安人少時貧窶有一人從門過相之曰君後當與天子交手共戲至是安人尋此人不知所在遷廣陵太守行南兖州事高帝在淮陰安人遙相結事元徽初除司州刺史領義陽太守及桂陽王休範反安人遣軍援京師建平王景素作難安人破其軍於葛橋景素誅安人行南徐州事城局參軍王回素為安人所親盜絹二疋安人流涕謂之曰我於卿契闊備嘗今日犯王法此乃

卿負我於軍門斬之厚為斂祭軍府皆震服轉東中郎
司馬行會稽郡事安人將東高帝與別宴語淹留終日
時蒼梧縱虐高帝憂迫無計安人白高帝欲於東奉江
夏王躋起兵高帝不許乃止高帝即位為中領軍封康
樂侯自宋泰始以來內外頻有賊寇將帥以下各募部
曲屯聚京師安人表陳之以為自非淮北常備其外餘
軍悉皆輸遣若親近宜立隨身者聽限人數上納之故
詔斷衆募時王敬則以勲誠見親至於家國密事上唯

與安人論議謂安人曰署事有卿名我便不細覽也尋
為領軍將軍魏攻壽春至馬頭詔安人禦之魏軍退安
人沿淮進至壽春先是宋時亡命王元初聚黨六合山
僭大號自云垂手過滕州郡討之不能禽積十餘年安
人生禽之斬建康市高帝崩遺詔加侍中武帝即位為
丹陽尹遷尚書左僕射安人時屢啓密謀見賞又善結
尚書令王儉故世傳儉啓有此授尋上表以年疾求退
為吳興太守於家載米往郡時服其清吳興有項羽神

護郡聽事太守至郡不得先上必須祀以軔下牛安人
奉佛法不與神牛着屐上聽事又請僧像於聽上八關
齋俄而牛死葬廟側今呼為李公牛冢安人尋卒世以
神為崇謚肅侯子元履幼有操業甚閑政體為司徒竟
陵王子良法曹參軍與王融游狎及王融誅鬱林勅元
履隨右衛將軍王廣之北征密令於北殺之廣之先為
安人所厚又知元履無過甚擁護之會鬱林敗死元履
拜謝廣之曰二十二載父母之年自此以外丈人之賜

也仕梁為吳郡太守度支尚書衡廣青冀四州刺史

戴僧靜會稽永興人也少有膽力便弓馬事刺史沈文秀俱沒魏後將家屬叛還淮陰高帝撫畜之常在左右後於都私齋錦出事發繫南兗州獄高帝遣薛深餉僧靜酒食以刀子置魚腹中僧靜與獄吏飲既醉以刀刻械手自折鎖發屋而出歸高帝匿之齋內以其家貧年給穀千斛會魏軍至僧靜應募出戰單刀直前魏軍奔退又追斬三級時天寒甚乃脫衣口銜三頭拍浮而還

以功補軍主沈攸之事起袁粲據石頭高帝入朝堂遣僧靜將腹心先至石頭經畧袁粲時蘇烈據倉城門僧靜射書與烈夜縋入城粲登城西南門列燭火處分臺軍至射之火乃滅回登東門其將軍孫曇瓘驍勇善戰每盪一合輒大殺傷官軍死者百餘人軍主王天生殊死拒戰故得相持自亥至丑有流星赤色照地隆城中僧靜率力攻倉門身先士卒手斬粲於東門外軍燒門入遂破石頭以功除前將軍加寧朔將軍高帝即位封

建昌縣侯位太子左衛率武帝踐阼出為北徐州刺史
買牛給貧人耕種甚得荒情後除南中郎司馬淮南太
守永明八年己東王子響殺僚佐武帝召僧靜使領軍
向江陵僧靜面啓上曰己東王年少長史司馬捉之太
急忿不思難故耳天子兒過誤殺人有何大罪官忽遣
軍西上人情惶懼無所不至臣不敢奉勅上不答而心
善之徙為廬陵王中軍司馬高平太守卒謚壯侯

桓康北蘭陵承人也勇果驍悍家大明中隨高帝為軍

容從武帝在贛縣泰始初武帝起義為郡所繫衆皆散
康裝擔一頭貯穆后一頭貯文惠太子及竟陵王子良
自負置山中與門客蕭欣祖等四十餘人相結破郡獄
出武帝郡追兵急康等死戰破之隨武帝起兵推堅陷
陣膂力絕人所經村邑恣行暴害江南人畏之以其名
怖小兒畫其形於寺中病瘧者寫形帖著牀壁無不立
愈後除襄贛令桂陽王休範事起康棄縣還都就高帝
會事已平除員外郎元徽五年七月六日夜少帝微行

至領軍府帝左右人曰一府皆眠何不緣牆入帝曰我
今夕欲向一處作適待明日夜康與高帝所養健兒盧
荒向黑於門間聽得其語明旦王敬則將帝首至扣府
門康謂是變與荒黑拔白刃欲出仍隨高帝入宮高帝
鎮東府除武陵王中兵除寧朔將軍帶蘭陵太守常衛
左右高帝誅黃回回時為南兗州部曲數千欲收之恐
為亂召入東府停外齋使康數回罪而殺之回初與屯
騎校尉王宜興同為石頭之謀高帝隱其事猶以重兵

付回而配腹心時人為之語曰欲併張問桓康除後軍將軍直閣將軍南濮陽太守建元元年封吳平縣伯高帝謂康曰卿隨我日久未得方伯亦當未解我意正欲與卿先共滅虜耳三年魏軍動遣康於淮陽與戰大破之進陷魏樊城高帝喜明年以康為持節都督青冀二州刺史武帝即位卒於驍騎將軍

焦度字文績南安氏人也祖文珪避難居仇池宋元嘉中裴方明平楊難當度父明與千餘家隨居襄陽乃立

天水郡略陽縣以居之度少有氣幹便弓馬以歸國補
北館客孝武初青州刺史顏師伯出鎮滑臺度領幢主
送之師伯版為已輔國府參軍魏寇清口度領軍救援
與魏騎將豹皮公遇交槩關豹皮公墮馬獲其具裝馬
手殺數十人師伯啓孝武稱度氣力弓馬並絕人帝召
還充左右見度形狀謂師伯曰真健人也補晉安王子
勛夾轂隊主隨鎮江州子勛起兵以度為龍驤將軍領
三千人為前鋒屯赭圻每與臺軍戰無不勝事敗逃宮

亭湖中為寇朝廷甚憂之使江州刺史王景文誘降之
景文以為已鎮南參軍領中軍直兵厚待之隨景文還
都常在府州內景文被害夕度大怒勸景文拒命景文
不從明帝不知也以度武勇補晉熙王燮防閤隨鎮夏
口武陵王贊代變為郢州以度為贊前軍參軍沈攸之
事起轉度中直兵高帝又使假度輔國將軍屯騎校尉
轉右將軍度容貌壯醜皮膚若漆質直木訥口不能出
言晉熙王夾轂主周彥與度俱在郢州彥有左右人與

度父同名彥常呼其名使役之度嗔忿呵責彥曰汝知
我諱明而恒呼明何也及在郢城尤為攸之所忿攸之
大衆至夏口將直下都留偏兵守郢而已度於城樓上
肆言罵辱攸之至自發露形體穢辱之故攸之怒改計
攻城甚急度親力戰攸之衆蒙盾將登度令投以穢器
賊衆不能冒至今呼此樓為焦度樓事寧度功居多轉
後軍將軍封東昌縣子東宮直閭將軍還都為貴戚追
叙郢城暴露穢褻之事其慙如此為人朴澁欲就高帝

求州比及見竟不涉一語高帝以其不閑政事竟不用
之後求竟陵郡不知所以置辭親人授之辭百餘言度
習誦數日皆得上口會帝履行石頭城度於衆中自陳
臨時卒忘其所教乃大言曰度啓公度啓公度無食帝
笑曰卿何憂無食即賜米百斛建元四年乃除淮陽太
守性好酒醉輒暴怒上常使人節之度年雖老而氣力
如故除游擊將軍卒

曹虎字士威下邳人也本名虎頭高帝鎮東府使虎與

戴僧靜各領白直三百人後為屯騎校尉帶南城令石頭平封羅江縣男及高帝受禪改封監利縣武帝即位累遷驍騎將軍帝以虎頭名鄙勅改之鬱林即位進號前將軍隆昌元年為雍州刺史建武二年進爵為侯東昏即位為前將軍鎮軍司馬永元元年始安王遙光反虎領軍屯青溪大橋事寧轉散騎常侍右衛將軍虎形幹甚毅善於誘納晚節在雍州致見錢七千萬皆厚輸大郭他物稱是馬八百匹僕妾蔬食膳無膏腴嘗為梅

蟲兒如法珍設女妓金翠曜眼器服精華蟲兒等因是
欲誣而奪之人傳虎每好風景輒開庫招拍張武戲帝
疑虎舊將領兼利其財新除未及拜遇誅及收兵至歎
曰諸人知我無異意所以殺我政欲取吾財貨伎女耳
恨令衆輩見之諸子長成者並見誅唯子世宗兄弟三
人未冠繫尚方梁武帝兵至得免虎雖武士頗有知人
鑒梁武帝及崔慧景之在襄陽時崔方貴盛虎性儉嗇
無所餉遺獨饋梁武帝謂曰卿必大貴我當不及見今

以弱子相託每密送錢物并好馬時帝在戎多乏就虎
換借未嘗不得遂至十七萬及帝即位思其惠天監二
年帝忽夢如田塍下行兩邊水深無底夢中甚懼忽見
虎來負帝得過曰卿今為天下主乃爾忘我顧託之言
邪我兒饑寒無衣昔所換十七萬可還其市宅帝覺即
使主書送錢還之使用市宅子世澄世宗並蒙抽擢三
二年間皆迭為大郡世宗性嚴明頗識兵勢末遂封侯
富顯歷位太子左衛率贈左散騎常侍左衛將軍謚曰

壯侯

呂安國廣陵人也宋大明末以將領見任隱重有幹局
為劉劭所稱泰始二年為劭軍副征殷琰以功封鍾武
縣男累遷兗州刺史及沈攸之事發高帝以安國為湘
州刺史建元元年進爵為侯轉右衛將軍加給事中後
改封湘鄉侯武帝即位累遷光祿大夫加散騎常侍安
國欣有文授謂其子曰汝後勿袴褶驅使單衣猶恨不
稱當為朱衣官也歷都官尚書太子左率領軍將軍安

國累居將率在朝以宿舊見遇尋遷散騎常侍金紫光祿大夫給扶永明八年卒謚肅侯

周山圖字季寂義興義鄉人也家世寒賤年十五六氣力已絕衆噉食恒兼數人鄉里獵戲集聚嘗為主帥指麾處分皆見從不事產業恒願為將雖勇健而不閑弓馬於書題甚拙謹直少言未嘗說人短長與人周旋皆白首不異宋元嘉二十七年魏軍至瓜步臺符取健兒山圖應募領白衣隊主以軍功除員外郎加鎮武將軍

及鎮軍將軍張永侵魏山圖領二千人迎運至武原為
魏軍所追合戰多傷殺魏軍稱其勇呼為武原將及永
軍大敗山圖收散卒守下邳城還除給事中冗從僕射
直閤將軍山圖好酒多失明帝數加怒誚後遂自改累
遷淮南太守時盜發桓溫冢大獲寶物客竊取以遺山
圖山圖不受簿以還官遷左中郎將高帝輔政山圖密
啓沈攸之久有異圖宜為之備帝笑而納之攸之事起
武帝為西討都督啓山圖為軍副攸之攻郢城武帝令

山圖量其形勢山圖曰攸之為人性度險刻無以結固
士心如頓兵堅城之下適所以為離散之漸耳及攸之
敗高帝謂曰周公前言可謂明於見事矣建元元年封
晉興縣男武帝踐阼遷竟陵王鎮北司馬帶南平昌太
守以湓城之舊出入殿省甚見親信義鄉縣長風廟神
姓鄧先經為縣令死遂發靈山圖啓乞加神位輔國將
軍上答曰足狗肉便了事何用階級為轉黃門郎領羽
林監四廂直衛山圖於新林立墅舍晨夜往還上謂曰

卿罷萬人都督而輕行郊外自今往墅可以仗身自隨以備不虞及疾上手勅問疾尋卒年六十四

周盤龍北蘭陵人宋世土斷屬東平盤龍膽氣過人尤便弓馬隨軍討擊陷陣先登以軍功累遷龍驤將軍封晉安子元徽二年桂陽構難盤龍時為冗從僕射隨高帝出頓新亭稍至驍騎將軍改封沘陽侯高帝即位進號右將軍建元元年魏攻壽春以盤龍為軍主假節助豫州刺史垣崇祖拒魏盤龍率馬步於西澤中奮擊殺

傷數萬上聞之喜下詔稱美送金釵十二枚與其愛妾杜氏手勅曰餉周公阿杜轉太子左衛率明年魏攻淮陽圍角城先是上遣軍主成買戍角城買辭於王儉曰今段之行必以死報衡門蓬戶不朱斯白小人弱息當得一子儉問其故答曰若不歿虜則必破虜兒不作孝子當作世子也孝子則門加素堊世子則門施丹堊至是魏圍買數重上遣領軍將軍李安人救之勅盤龍率馬步下淮陰就李安人買與魏拒戰手所傷殺無數買

晨起手中忽有數升血其日戰死首見斬猶尸據鞍奔
還軍然後僵盤龍子奉叔單馬率二百餘人臨陣魏軍
萬餘騎張左右翼圍繞之一騎走還報奉叔已沒盤龍
方食棄筋馳馬奮稍直奔魏陣自稱周公來魏人素畏
盤龍莫不披靡時奉叔已大殺魏軍得出在外盤龍不
知乃東西衝擊魏軍莫敢當奉叔見其父久不出復躍
馬入陣父子兩騎綦攪數萬人魏衆大敗盤龍父子由
是名播北國形甚羸而臨軍勇果諸將莫逮永明五年

為大司馬加征虜將軍濟陽太守武帝數講武常令盤
龍領馬軍校尉騁稍後以疾為光祿大夫尋出為兗州
刺史進爵為侯角城戍將張蒲與魏潛通因大霧乘船
入清中採樵載魏人直向城東門盤龍坐為有司所奏
詔白衣領職八坐尋奏復位加領東平太守盤龍表年
老才弱不可鎮邊求解職見許還為散騎常侍光祿大
夫武帝戲之曰卿若貂蟬何如兜鍪盤龍曰此貂蟬從
兜鍪中生耳尋病卒年七十九子奉叔勇力絕人少隨

盤龍征討所在暴掠為東宮直閤將軍鬱林在西州奉
叔密得自進及即位與直閤將軍曹道剛為心膂奉叔
善騎馬帝從其學騎尤見親寵得入內無所忌憚陵轢
朝士就司空王敬則換米二百斛敬則以百斛與之不
受敬則大懼乃更餉二百斛并金鈴等物敬則有一內
妓帝令奉叔求奉叔不通徑前從者執單刀皆半拔敬
則跣足入內既而自計不免乃出遙呼奉叔曰弟那忽
能顧奉叔宣旨求妓意乃釋與綦母珍曹道剛朱隆之

共相脣齒煽弄威權奉叔常翼單刀二十口出入禁圍
既無別詔門衛莫敢訶每語人云周郎刀不識君求武
帝御角及輿并求御仗以給左右事無不從又求黃門
郎明帝作輔固執不能得乃令蕭譔蕭坦之說帝出奉
叔為外鎮樹腹心又說奉叔以方伯之重奉叔納其言
隆昌元年出為青冀二州刺史奉叔就帝求千戶侯帝
許之明帝以為不可忽謂蕭譔曰若不能見與千戶侯
不復應減五百戶不爾周郎當就刀頭取辦耳既而封

曲江縣男奉叔大怒於衆中攘刀厲目切齒明帝說諭
乃受及將之鎮明帝慮其不可復制因其早入引往後
堂執送廷尉盡之

王廣之字士林一字林之沛郡相人也少好弓馬便捷
有勇力初為馬隊主隨劉劭征殷琰琰兵既盛而合肥
戍又阻兵為寇劭宣令軍中求征合肥者以大郡賞之
廣之曰若得將軍所乘馬判能制之劭幢主皇甫肅謂
劭曰廣之敢奪節下馬可斬劭曰觀其意必能立功即

推鞍下馬與之及行合肥果拔劬大賞之即推為軍主
廣之於劬前謂肅曰節下若從卿言非唯斬壯士亦自
無以平賊卿不賞才乃至此邪廣之由此知名初封蒲
圻子肅有學術善舉止廣之亦雅相推慕劬亡後肅更
依廣之廣之盛相賞接啓武帝以為東海太守其不念
舊惡如此廣之後以征伐功位給事中冠軍將軍改封
寧都縣子高帝廢蒼梧出廣之為徐州刺史鍾離太守
沈攸之事起廣之留都下豫平石頭仍從高帝頓新亭

高帝誅黃回回弟駟及從弟馬兄子奴亡逸高帝與廣之書曰黃回雖有微勲而罪過轉不可容近遂啓請御大小二輿為刺史服飾吾乃不惜為其啓聞政恐得輿復求畫輪車此外罪不可勝數弟自悉之今啓依法令廣之於江西搜捕駟等建元元年進爵為侯武帝即位累遷右衛將軍散騎常侍前軍將軍延興元年為豫州刺史豫廢鬱林後拜為鎮南將軍江州刺史進應城縣公建武中位侍中鎮軍將軍給扶後卒贈車騎將軍謚

壯公子珍國梁史有傳

垣崇祖字敬遠一字僧寶略陽垣道人也伯父護之宋
豫州刺史自有傳父詢之驍敢有氣力元凶弑逆隸輔
國將軍張柬時張超手行大逆亦領軍隸柬詢之規殺
之慮柬不同柬宿有此志又未測詢之同否互相觀察
會超來論事柬色動詢之覺之即共定謀遣召超超疑
之不至改宿他所詢之不知徑往斫之殺其僕於牀因
與東南奔時孝武已即位以為積射將軍梁山之役力

戰中流矢卒贈冀州刺史宗祖年十四有幹略伯父護之謂門宗曰此兒必大吾門汝等不及也後隨徐州刺史薛安都入魏尋又率門宗據朐山歸宋求淮北立功明帝以為北琅邪蘭陵二郡太守封下邳子及高帝鎮淮陰崇祖時戍朐山既受都督祇奉甚至帝以其武勇善待之崇祖謂其妹夫皇甫肅曰此真吾君也吾今逢主矣所謂千載一時遂密布誠節高帝威名已著宋明帝尤所忌疾徵為黃門郎規害高帝崇祖建策以免由

是甚見親待參豫密謀元徽末高帝懼禍令崇祖入魏
即以家口託皇甫肅勒數百人將入魏界更聽後旨會
蒼梧廢高帝召崇祖領部還都從平沈攸之累遷冠軍
將軍兗州刺史及高帝踐阼謂崇祖曰我新有天下夷
虜不識運命必當重其蟻衆以送劉昶為辭以為軍衝
必在壽春能制此寇非卿莫可為捍徙為豫州刺史監
豫司二州諸軍事封望蔡侯建元元年魏遣劉昶馬步
號三十萬攻壽春崇祖於城西北立堰塞淝水堰北起

小城周為深塹使數千人守之謂長史封延伯曰虜必
悉力攻小城若破此堰放水一激急逾三峽自然沈溺
豈非小勞而大制邪及魏兵由西道集堰南分軍東路
內薄攻小城崇祖著白紗帽肩輿上城手自轉式日晡
時決小史埭水勢奔下魏攻城之衆溺死以千數大衆
退走初崇祖於淮陰見高帝便自比韓白衆咸不信唯
帝獨許之及破魏軍啓至上謂朝臣曰崇祖嘗擬韓白
今真其人也進號都督崇祖聞陳顯達李安人皆增給

軍儀乃啓求鼓吹上勅曰韓白何可不與衆異給鼓吹一部崇祖慮魏復攻淮北啓徙下蔡戍於淮東其冬魏果欲攻下蔡既聞內徙乃揚聲平除故城衆疑魏當於故城立戍崇祖曰下蔡去鎮咫尺魏豈敢置戍實是欲除此城正恐奔走殺之不盡耳魏果夷掘下蔡城崇祖大破之武帝即位為五兵尚書領驍騎將軍初豫章王有盛寵武帝在東宮崇祖不自附結及破魏軍詔使還朝與共密議武帝疑之曲加禮待酒後謂曰世間流言

我已豁諸懷抱自今已後富貴見付也宗祖拜謝及去
高帝復遣荀伯玉勅以邊事受旨夜發不得辭東宮武
帝以為不盡誠心銜之永明元年召為五兵尚書至京
師詔稱其與荀伯玉構扇邊荒誅之時年四十四故人
無敢至者獨有前豫州主簿夏侯恭叔出家財為殯時
人以比樂布恭叔譙國人宗祖為豫州聞其才義辟為
主簿兼掌書翰高帝即位方鎮皆有賀表王儉見宗祖
表咨嗟良久曰此恭叔辭也時宋氏封爵隨軍遷改恭

叔以柳元景中興元勲劉劭殞身王事不宜見廢上表
論之甚有義理事雖不從優詔見答後為竟陵令惠化
大行木連理上有光如燭咸以為善政所致崇祖從父
兄榮祖字華先父諒之宋北中郎府參軍榮祖少學騎
射或曰何不學書榮祖曰曹操曹丕上馬橫槊下馬談
論此可不負飲食矣吾輩無自全之伎何異犬羊乎宋
孝建中為後軍參軍伯父護之子襲祖為淮陽太守孝
武以事徙之嶺南護之不食而死帝疾篤又使殺襲祖

襲祖臨死與榮祖書曰弟嘗勸我危行言遜今果敗矣
明帝初即位四方反叛除榮祖冗從僕射還徐州說刺
史薛安都曰天之所廢誰能興之使君今不同八百諸
侯如下官所見非計中也安都曰今京都無百里地莫
論攻圍取勝自可相拍手笑殺且我不欲負孝武榮祖
曰孝武之行足致餘殃今雖天下雷同正是速死無能
為也安都曰不知諸人云何我不畏此大蹄馬在近急
便作計榮祖被拘不得還因為安都將領安都引魏軍

入彭城榮祖攜家屬南奔朐山高帝在淮陰榮祖歸附
高帝保持之及宋明帝崩高帝書送榮祖詣僕射褚淵
除東海太守淵謂曰蕭公稱卿幹略故以郡相處榮祖
善彈登西樓見翔鵠雲中謂左右當生取之於是彈其
兩翅毛脫盡墜地無傷養毛生後飛去其妙如此元徽
末蒼梧凶狂恒欲害高帝帝欲奔廣陵起事荀伯玉等
皆贊成之榮祖諫曰領軍府去臺百步公走人豈不知
若單騎輕行廣陵人一旦閉門不相受公欲何之公今

動足下牀恐便有叩臺門者公事去矣蒼梧明夕自至
領軍府扣門欲害帝帝嘗以書案下安鼻為楯以鐵為
書鎮如意甚壯大以備不虞欲以代杖蒼梧至府而曰
且申今夕須至一處作適還當取奴尋遇弑高帝謂榮
祖曰不用卿言幾無所成豫佐命勲封將樂縣子永明
二年為尋陽相南新蔡太守被告作大形棺材盛仗使
鄉人載度江北案驗無實見原後拜兗州刺史初已東
王子鸞事方鎮皆啓稱子鸞為逆榮祖曰此非宜言政

應云劉寅等孤負恩獎逼迫已東使至於此時諸啓皆不得通事平後上乃省視以榮祖為知言九年卒從弟歷生亦為驍將位太子右率性苛暴與始安王遙光同反伏誅榮祖從父閎字叔通父遵位員外常侍閎為宋孝武帝南中郎參軍孝武帝即位以為交州刺史時交土全實閎罷州還資財鉅萬孝武末年貪恣刺史二千石罷任還都必限使奉獻又以捕戲取之要令罄盡乃止閎還至南州而孝武晏駕擁南資為富人明帝初為司

州刺史北破薛道擿封樂鄉縣男出為益州刺史蜀還之資亦數千金先送獻物傾西資之半明帝猶嫌其少及閔至都詣廷尉自簿先詔獄官留閔於是悉送資財然後被遣凡蠻夷不受鞭罰輸財贖罪謂之賕時人謂閔為被賕刺史歷度支尚書衛尉高帝輔政使褚淵為子晃求閔女閔辭以齊大非偶帝雖嘉其退讓而心不能歡即以晃婚王仙女謂豫章王疑曰前欲以白象與垣公婚者重其夷澹事雖不遂心常快然白象晃小字

也及高帝即位以有誠心封爵如故卒於金紫光祿大夫謚曰定子禧伯襲爵禧伯少負氣豪俠妙解射雉尤為武帝所重以為直閣將軍與王文和俱任頗以地勢陵之後出為巴西梓潼二郡太守時文和為益州刺史曰每憶昔日俱在閣下卿時視我如我今日見卿因誣其罪馳信啓之又輒遣蕭寅代禧伯為郡禧伯亦別遣啓臺待報寅以兵圍之明帝輔政知其無罪不欲乖文和乃勅禧伯解郡還為寅軍所躡束手受害閔弟子曇

深以行義稱為臨城縣罷歸得錢十萬以買宅奉兄退
無私蓄先是劉楷為交州謂王儉曰欲一人為南土所
聞者同行儉良久曰得之矣昔垣閔為交州閔弟閔又
為九真郡皆著信南中羽林監曇深者閔之子也雅有
學行當令同行及隨楷未至交州而卒儉惆悵良久曇
深妻鄭氏字獻英滎陽人時年二十子文凝始生仍隨
楷到鎮晝夜紡績傍無親援年既盛美甚有容德自厲
冰霜無敢望其門者居一年私裝了乃告楷求還楷大

驚曰去鄉萬里固非孀婦所濟遂不許鄭又曰垣氏羈
魂而不反而其孤藐幼妾若一同灰壤則何面目以見
先姑因大悲泣楷愴然許之厚為之送於是間關危險
遂得至鄉畢葬乃曰可以下見先姑矣時文凝年甫四
歲親教經禮訓以義方州里稱美又有吳興丘景賓字
彥先亦以節義聞父康祖無錫令亡後僮僕數十人及
宅宇產畜景賓悉讓與兄鎮之鎮之又推齋屋三間與
之亦不肯受太守孔山士歎曰聞柳下惠之風貪夫廉

懦夫有立志復見之矣終於奉朝請

沈文季字伯達吳興武康人也父慶之宋司空自有傳
孝建二年文季起家辟州主簿以寬雅正直見知尤善
博塞及彈碁以慶之勲重封文季為山陽縣五等伯位
中書郎父慶之為景和所殺兵仗圍宅收捕諸子文季
長兄文叔謂文季曰我能死爾能報遂自殺文季揮刀
馳馬去收者不敢追遂免明帝立為黃門郎領長水校
尉明帝宴會朝臣以南臺御史賀咸為柱下史糾不醉

者文季不肯飲酒被驅下殿晉平王休祐為南徐州帝
就褚淵求幹事人為上佐淵舉文季轉驃騎長史南東
海太守休祐被殺雖用薨禮僚佐皆不敢至文季獨往
墓展哀元徽初自祕書監出為吳興太守文季飲酒至
五斗妻王氏飲亦至三斗文季常與對飲竟日而視事
不廢昇明元年沈攸之反高帝加文季為冠軍將軍督
吳興錢塘軍事攸之先為景和銜命殺慶之至是文季
收殺攸之弟新安太守登之誅其宗族以復舊怨親黨

無吹火焉君子以文季能報先恥齊國建為侍中領祕書監建元元年轉太子右衛率侍中如故改封西豐縣侯文季風采稜岸善於進止司徒褚淵當世貴望頗以門戶裁之文季不為之屈武帝在東宮於元圃宴朝臣文季數舉酒勸淵淵甚不平啓武帝曰沈文季謂淵經為其郡依然猶有故情文季曰惟桑與梓必恭敬止豈如明府亡國失土不識粉榆遂言及魏軍動事淵曰陳顯達沈文季當今將略足委以邊事文季諱稱將門因

是發怒啓武帝曰褚淵品藻人流臣未知其身死之日
何面目見宋明帝武帝笑曰沈率醉也中丞劉休舉其
事見原後豫章王北宅後堂集會文季與褚淵並善琵琶
酒闌淵取樂器為明君曲文季便下席大唱曰沈文
季不能作伎兒豫章王疑又解之曰此故當不損仲容
之德淵顏色無異終曲而止永明中累遷領軍將軍文
季雖不學發言必有辭采武帝謂文季曰南土無僕射
多歷年所文季對曰南風不競非復一日當世善其對

明帝輔政欲以文季為江州遣左右單景雋宣旨文季
陳讓稱老不願出外因問右執法有人未景雋還具言
之延興元年以為尚書右僕射明帝即位加領太子詹
事尚書令王晏嘗戲文季為吳興僕射文季答曰琅邪
執法似不出卿門建武二年魏軍南伐明帝以為憂制
文季鎮壽春文季入城門嚴加備守魏軍尋退百姓無
所損永元元年轉侍中左僕射始安王遙光反其夜遣
三百人於宅掩取文季欲以為都督而文季已還臺明

日與尚書令徐孝嗣守宮城戎服坐南掖門上時東昏
已行殺戮孝嗣深懷憂慮欲與文季論當世事文季輒
引他辭終不得及事寧加鎮軍將軍署府史文季以時
方昏亂託以老病不豫朝機兄子昭略謂文季曰阿父
年六十為員外僕射欲求自免豈可得乎文季笑而不
答見孝嗣被害其日先被召文季便知敗舉動如常登
車顧曰此行恐往而不返也於華林省死時年五十八
朝野冤之中興元年贈司空謚忠憲公昭略字茂隆文

叔之子也文叔附載慶之傳昭略性狂儁不事公卿使
酒仗氣無所推下嘗醉晚日負杖攜家賓子弟至婁湖
宅逢王景文子約張目視之曰汝是王約邪何乃肥而
癡約曰汝沈昭略邪何乃瘦而狂昭略撫掌大笑曰瘦
已勝肥狂又勝癡奈何王約奈汝癡何昇明末為相國
西曹掾高帝賞之及即位謂王儉曰南士中有沈昭略
何職處之儉以擬前軍將軍上不欲違乃可其奏尋為
中書郎累遷侍中王晏嘗戲昭略曰賢叔可謂吳興僕

射昭略曰家叔晚登僕射猶賢於尊君以卿為初蔭永
元中與叔父文季俱被召入華林省茹法珍等進藥酒
昭略怒罵徐孝嗣曰廢昏立明古今令典宰相無才致
有今日以甌投其面曰使為破面鬼死時言笑自若了
無懼容孝嗣謂曰見卿使人想夏侯泰初答曰明府猶
憶太初便是方寸不能都豁下官見龍逢比干欣然相
對霍光脫問明府今日之事何辭答之邪死時年三十
餘昭略弟昭光聞收兵至家人勸逃去昭光不忍捨母

入執母手悲泣遂見殺時昭明子曇亮已得逃去聞昭
光死乃曰家門屠滅獨用生何為又絕吭而死時人歎
其累世孝義中興元年贈昭略太常昭光廷尉

劉懷珍字道玉平原人漢膠東康王寄之後也其先劉
植為平原太守因家焉祖昶從慕容德南渡因家于北
海都昌宋武帝平齊以為青州中從事位至員外常侍
伯父奉伯宋世位至陳南頓二郡太守懷珍幼隨奉伯
至壽陽豫州刺史趙伯符出獵百姓聚觀懷珍獨避不

視奉伯異之曰此兒方興吾宗本州辟主簿元嘉二十
八年亡命司馬順則聚黨東陽州遣懷珍將千人討之
宋文帝召問破賊事懷珍讓功不肯當親人怪問焉懷
珍曰昔國子尼恥陳河間之級吾豈能論邦域之捷哉
時人稱之江夏王義恭出鎮盱眙道過懷珍以應對見
重取為驃騎長史兼墨曹行參軍孝建初為義恭大司
馬參軍直閣將軍隨府轉太宰參軍大明二年以軍功
拜樂陵河間二郡太守賜爵廣晉縣侯司空竟陵王誕

反郡人王弼門族甚盛勸懷珍起兵助誕懷珍殺之帝
嘉其誠除豫章王子尚車騎參軍母憂去職服闋見江
夏王義恭義恭曰別子多年那得不老對曰公恩未報
何敢便老義恭善其對累遷黃門郎領虎賁中郎將桂
陽王休範反加懷珍前將軍守石頭出為豫州刺史加
都督建平王景素反懷珍遣子靈哲領兵赴建鄴沈攸
之在荆楚遣使人許天保說結懷珍懷珍斬之送首於
高帝帝送示攸之封中宿縣侯攸之圍郢懷珍遣兵萬

人破賊前鋒收其器甲進平南將軍增督二州初宋孝武世高帝為舍人懷珍為直閤相遇早舊懷珍假還青州高帝有驄馬齧人不可騎送與懷珍別懷珍還報上百疋絹或謂懷珍曰蕭君此馬不可騎是以相與君報百疋不亦多乎懷珍曰蕭君局量堂堂寧應負人此絹吾方欲以身名託之豈復計錢物多少高帝輔政以懷珍內資未多二年冬徵為都官尚書領前將軍以第四子晃代為豫州刺史或疑懷珍不受代高帝曰我布衣

時懷珍便推懷投款況在今日寧當有異晃發經日疑
論不止上乃遣軍主房靈人領百騎進送晃謂靈人曰
論者謂懷珍必有異同我期之有素必不應爾卿是其
鄉里故遣卿行非惟衛新亦以迎故懷珍還仍授相國
右司馬及齊臺建朝士人人爭為臣吏以懷珍為宋臺
右衛懷珍謂帝曰人皆迎新臣獨送故豈以臣篤於本
乎建元元年轉左衛將軍加給事中改封霄城侯懷珍
年老以禁旅辛勤求為閑職轉光祿大夫卒遺言薄葬

贈雍州刺史謚敬侯子靈哲字文明位齊郡太守前將
軍靈哲所生母嘗病靈哲躬自祈禱夢見黃衣老公與
藥曰可取此食之疾可立愈靈哲驚覺於枕間得之如
言而疾瘳藥似竹根於齋前種葉似莧此嫡母崔氏及
兄子景煥泰始中沒于魏靈哲為布衣不聽樂及懷珍
卒當襲爵因辭以兄子在魏存亡未測無容越當茅土
朝廷義之靈哲傾產私贖嫡母及景煥累年不能得武
帝哀之令北使者請之魏人送以還南襲懷珍封爵靈

哲歷兗州刺史隆昌元年卒懷珍從子懷慰字彥泰祖奉伯宋元嘉中為冠軍長史父乘人冀州刺史死於義嘉事懷慰持喪不食醯醬冬日不用絮衣養孤弟妹事寡叔母皆有恩義仕宋為尚書駕部郎懷慰宗從善明等為高帝心腹懷慰亦預焉齊國建上欲置齊郡於都下議者以江右土沃流人所歸乃置於瓜步以懷慰為輔國將軍齊郡太守上謂懷慰曰齊邦是王業所基吾方欲以為顯任經理之事一以委卿有手勅曰有文事

必有武備今賜卿玉環刀一口懷慰至郡修城郭安集
居人墾廢田二百頃決沈湖灌溉不受禮謁人有餉其
新米一斛者懷慰出所食麥飯示之曰食有餘幸不煩
此因著廉吏論以達其意高帝聞之手勅褒賞進督秦
沛二郡妻子在都賜米三百石兗州刺史柳世隆與懷
慰書曰膠東流化潁川致美以今方古曾何足云懷慰
本名聞慰武帝即位以與舅氏名同勅改之後兼安陸
王北中郎司馬卒明帝即位謂僕射徐孝嗣曰劉懷慰

若在朝廷不憂無清吏也子霽香歌俱知名梁世香自有傳霽列在孝友歌列在隱逸懷珍族弟善明父懷人宋世為齊北海二郡太守元嘉末青州饑荒人相食善明家有積粟躬食鹽粥開倉以救鄉里多獲全濟百姓呼其家田為續命田善明少而靜處好讀書刺史杜驥聞其名候之辭不相見年四十刺史劉道隆辟為中從事不就懷人謂善明曰我已知汝立身復欲見汝立官也善明乃應辟仍舉秀才宋孝武見其射策彊直甚異

之泰始初徐州刺史薛安都反青州刺史沈文秀應之
時州居東陽城善明家在郭內不能自拔伯父彌之誘
說文秀求自効文秀使領軍主張靈慶等五千人援安
都彌之出門密謂部曲曰始免禍坑矣行至下邳乃背
文秀善明從伯懷恭為北海太守據郡相應善明密契
收集門宗部曲得三千人夜斬關奔北海族兄乘人又
聚衆渤海以應朝廷而彌之尋為薛安都所殺明帝贈
彌之青州刺史以乘人為寧朔將軍冀州刺史善明為

寧朔長史北海太守除尚書金部郎乘人病卒仍以善
明為冀州刺史文秀既降除善明海陵太守郡境邊海
無樹木善明課人種榆櫟雜果遂獲其利還為直閣將
軍五年魏克青州善明母在焉魏人移置桑乾善明布
衣蔬食哀戚如持喪明帝每見為之歎息轉已西梓潼
二郡太守善明以母在魏不願西行泣涕固請見許朝
廷多哀善明心事元徽初遣北使朝議令善明舉人善
明舉州鄉北平田惠紹使魏贖得母還時宋後廢帝新

立羣公秉政善明獨結事高帝委身歸誠出為西海太守行青冀二州刺史善明從弟僧副與善明俱知名於鄉里泰始初魏攻淮北僧副將部曲二千人東依海島高帝在淮陰壯其所為召與相見引為安成王撫軍參軍後廢帝肆暴高帝憂恐嘗令僧副微行伺察聲論使密告善明及東海太守垣榮祖曰人多見勸北固廣陵恐一旦動足非為長算今秋風行起卿若能與垣東海微動魏兵則我情計可立善明曰宋氏將亡愚智所辨

胡虜若動反為公患公神武不世出唯當靜以待之因

機奮發功業自定不可遠去根本自貽猖獗僧副還導
其言高帝納之廢帝見殺召善明為高帝驃騎諮議行
南徐州事沈攸之反高帝深以為憂善明獻計曰沈攸
之控引八州縱情蓄斂包藏賊志於焉十年性既險躁
才非持重起逆而累自遜回不進應有所待也一則暗
於兵機二則人情離怨三則有掣肘之患四則天奪其
魄本疑其剽勇長於一戰輕速掩襲未脩今六師齊奮

諸侯同舉此已寵之爲耳事平高帝召善明還都謂曰
卿策沈攸之雖張良陳平適如此耳仍遷太尉右司馬
齊臺建爲右衛將軍辭疾不拜司空褚淵謂之曰高尚
之事乃卿從來素志今朝廷方相委待詎得學松喬邪
善明答曰我本無宦情既逢知己所以戮力驅馳今天
地廓清朝廷濟濟鄙吝既申不敢昧於富貴矣高帝踐
阼以善明勲誠欲與之祿召謂曰淮南近畿國之形勝
自非親賢不使居之卿爲我卧治也乃代明帝爲淮南

宣城二郡太守遣使拜授封新淦伯善明至郡上表陳
事凡十一條其一以為天地開創宜存問遠方宣廣慈
澤其二以為京都遠近所歸宜遣醫藥問其疾苦年九
十以上及六疾不能自存者隨宜量賜其三以為宋氏
赦令蒙原者寡愚謂今下赦書宜令事實相副其四以
為劉昶猶存容能送死境上諸城宜應嚴備其五以為
宜除宋氏大明以來苛政細制以崇簡易其六以為凡
諸土木之費且可權停其七以為帝子王女宜崇儉約

其八以為宜詔百官及府州郡縣各貢讜言以宏廣唐
虞之美其九以為忠貞孝悌宜擢以殊階清儉苦節應
授以政務其十以為革命惟始宜擇才北使其十一以
為交州險要荒之表宋末政苛遂至怨叛今宜懷以
恩德未應遠勞將士搖動邊氓又撰賢聖雜語奏之託
以諷諫上優詔答之又諫起宣陽門表陳宜明守宰賞
罰立學校制齊禮開賓館以接鄰國上答曰夫賞罰以
懲守宰飾館以待遐荒皆古之善政吾所宜勉更撰新

禮或非易制國學之美已勅公卿宣陽門今勅停寡德
多闕思復有聞善明身長七尺九寸質素不好聲色所
居茅齋斧木而已牀榻几案不加剗削少立節行常云
在家當孝為吏當清子孫楷式足矣及累為州郡頗黷
財賄崔祖思怪而問之答曰管子云鮑叔知我因流涕
曰方寸亂矣豈暇為廉所得金錢為贖母計及母還清
節方峻所歷之職廉簡不煩俸祿散之親友與崔祖思
友善祖思出為青冀二州善明遺書叙舊因相勗以忠

槩及聞祖思死慟哭乃得病建元二年卒遺命薄殯贈
左將軍豫州刺史謚烈伯子滌嗣善明家無遺儲唯有
書八千卷高帝聞其清貧賜滌家葛塘屯穀五百斛曰
葛屯亦吾之垣下令後世知其見異善明從弟僧副字
士雲位前將軍封豐陽男卒於己酉梓潼二郡太守上
圖功臣像讚僧副亦在焉兄法護字士伯有學業位濟
陰太守

薛深河東汾陰人宋徐州刺史安都之從子也本名道

深避高帝偏諱改焉安都以彭城降魏親族皆入北高
帝鎮淮陰深遁來委身自結於高帝果幹有氣力宋元
徽末以軍功至驃騎將軍軍主封竟陵侯沈攸之之難
高帝入朝堂豫章王疑代守東府使深領軍屯司徒右
府分備建鄴袁粲據石頭豫章王疑夜登門遙呼深深
驚起率軍赴難高帝即位除淮陰太守尋為直閣將軍
轉太子左率武帝即位遷左衛將軍隆昌元年為司州
刺史右將軍卒

張欣泰字義亨竟陵人也父興世宋代名將歷位雍州刺史自有傳欣泰生將門不以武業自居好隸書讀子史年十餘詣吏部尚書褚淵淵問張郎弓馬多少答曰性怯畏馬無力牽弓淵甚異之歷諸王府佐宋元徽中興世在家擁雍州還資見錢三千萬蒼梧王自領人劫之一夜垂盡興世憂懼病卒欣泰兄欣華時為安成郡欣泰悉封餘財以待之建元初為尚書都官郎武帝與欣泰早經款遇及即位以為直閣將軍領禁旅除豫章

王太尉參軍出為安遠護軍武陵內史還復為直閣步
兵校尉領羽林監欣泰通涉雅俗交結多是名素下直
輒著鹿皮冠納衣錫杖挾素琴有以啓武帝帝曰將家
兒何敢作此舉止後從駕出新林勅欣泰廉察欣泰停
杖松樹下飲酒賦詩制局監呂文度以啓武帝帝大怒
遣出數日意釋召謂曰卿不樂武職當處卿清貴除正
員郎出為鎮軍南中兵參軍南平內史已東王子響殺
僚佐上遣中庶子胡諧之西討使欣泰為副欣泰謂諧

之曰今太歲在西南逆歲行軍兵家深忌若且頓軍夏
口宣示禍福可不戰而禽也諧之不從進江津尹畧等
見殺事平欣泰徙為隨王子隆鎮西中兵改領河東內
史子隆深相愛重數與談宴意遇與謝朓相次典籤密
啓之武帝怒召還都屏居家巷置宅南岡下西接松山
欣泰負弩射雉恣情閑放聲伎雜藝頗多閑解明帝即
位為領軍長史遷詔議參軍上書陳便宜二十條其一
條言宜毀廢塔寺帝並優詔報答建武二年魏園鍾離

欣泰為軍主隨崔慧景救援及魏軍退而邵陽洲上餘兵萬人求輸馬五百匹假道慧景欲斷路攻之欣泰說慧景曰歸師勿遏古人畏之死地兵不可輕也慧景乃聽過時領軍蕭坦之亦援鍾離還啓明帝曰邵陽洲有死賊萬人慧景欣泰放而不取帝以此皆不加賞四年出為永陽太守永元初還都崔慧景圍城欣泰入城守備事寧除廬陵王安東司馬梁武帝起兵東昏以欣泰為雍州刺史欣泰與弟前始安內史欣時密謀結太子

右率胡松前南譙太守王靈秀直閭將軍鴻選含德主
帥苟勵直後劉靈運等並同契會帝遣中書舍人馮元
嗣監軍救郢如法珍梅蟲兒及太子右率李居士制局
監楊明泰等十餘人相送中興堂欣泰等使人懷刀於
坐斫元嗣頭墜果枰中又斫明泰破其腹蟲兒傷數創
手指皆墜居士踰牆得出如法珍亦散走還臺靈秀仍
往石頭迎建安王寶寅率文武數百唱警蹕至杜姥宅
欣泰初聞事發馳馬入宮冀法珍等在城內處分必盡

見委因行廢立既而法珍得返處分關門上仗不配欣
泰兵鴻選在殿內亦不敢發城外衆尋散少日事覺欣
泰胡松等皆伏誅欣泰少時有人相其當得三公而年
裁三十後瓦屋墜傷額又問相者云無復公相年壽更
增亦可得方伯耳死時年三十六

王奐字道明琅邪臨沂人宋中書監或之兄子也或自
有傳父粹字景深黃門侍郎奐出繼從祖球故小字彥
孫年數歲常侍球許甚見愛奐諸兄出身諸王國常侍

而奐起家著作佐郎琅邪顏延之與球情款稍異常撫
奐背曰阿奴始免寒士奐少而彊濟叔父或常以其家
事委之仕宋歷侍中祠部尚書轉掌吏部昇明初遷丹
陽尹初王晏父普曜為沈攸之長史常懼攸之舉事不
得還奐為吏部轉普曜為內職晏深德之及晏仕齊武
帝以奐宋氏外戚而從弟蘊又同逆疑有異志晏叩頭
保奐無異志時晏父母在都請以為質武帝乃止累遷
尚書右僕射王儉卒上欲用奐為尚書令以問晏晏位

遇已重意不推奐答曰抑世隆有勲望恐不宜在奐後
乃轉左僕射加給事中出為雍州刺史加都督與寧蠻
長史劉興祖不睦十一年奐遣軍主朱公恩征蠻失利
興祖欲以啓聞奐大怒收付獄興祖於獄以針畫漆合
盤為書報家稱枉令啓聞而奐亦馳信啓上誣興祖扇
動荒蠻上知其枉勅送興祖還都奐恐辭情翻背輒殺
之上大怒遣中書舍人呂文顯直閤將軍曹道剛領兵
收奐又別詔梁州刺史曹虎自江陵步出襄陽奐子彪

凶愚頗干時政士人咸切齒時文顯以漆匣匣塋侯在
船中因相誑云臺使封刀斬王彪及道剛曹虎文顯俱
至衆力既盛又懼漆匣之言於是議閉門拒命長史殷
叡與女壻也諫曰今開城門白服接臺使不過檻車徵
還隲官免爵耳彪堅執不同叡又曰宜遣典籤間道送
啓自申亦不患不被宥乃令叡書啓遣典籤間道出城
便為文顯所執叡又曰忠不背國勇不逃死百世門戶
宜思後計孰與仰藥自全則身名俱泰叡請先驅螻蟻

又不從。吳門生鄭羽叩頭啓吳乞出城迎臺使。吳曰：「我不作賊，欲先遣啓自申政，恐曹呂輩小人相陵藉故，且閉門自守耳。」彪遂出戰，敗走歸土人。起義攻州西門，彪登門拒戰，却之。司馬黃瑤起寧蠻，長史裴叔業於城內起兵攻吳。吳聞兵入，禮佛未起。軍人斬之。彪及弟爽、弼、殷、叡皆伏誅。吳長子太子中庶子融融弟司徒從事中郎琛於都棄市。餘孫皆原有琛弟肅秉，並奔魏。後得黃瑤起嚮食之弟佃女為長沙王晃妃，以男女並長，且又

出繼特不離絕與既誅故舊無敢至者汝南許明達先
為典參軍躬為殯斂經理甚厚當時高其節與弟份列
在梁史與從父兄績字叔素中書監或之子也弱冠為
祕書郎太子舍人轉中書舍人父或以此授超階令績
經年乃受或封曲安侯績襲其本爵為始平縣五等男
元徽末為黃門郎東陽太守武帝為撫軍吏部尚書張
岱選績為長史呈選牒高帝笑曰此可謂素望再遷義
興太守輒錄郡吏陳伯喜付陽羨獄欲殺之縣令孔道

不知何罪不受續教為有司奏坐白衣領職後長兼侍
中武帝出射雉續信佛法稱疾不從永元元年卒於太
常謚靖子續女適武帝寵子安陸王子敬永明二年子
敬納妃修外舅姑之敬武帝遣文惠太子相隨往續家
置酒設樂公卿皆冠冕而去當世榮之續弟約明帝世
數年廢錮梁武帝時為太子中庶子嘗謂約曰卿方當
富貴必不容久滯屈及梁武作輔謂曰我嘗相卿當富
貴不言今日富貴便當見由歷侍中左戶尚書廷尉續

長子雋不慧位止建安太守

通志卷一百三十七



總校官庶吉士臣侍朝

校對官庶吉士臣徐如澍

謄錄監生臣張耀臺